

EL APOCALIPSIS

O Je Huidibi Dios Yajhuin'ijx San Juan

1 Jayhui'my ity ma jada necy je Jesucristo y'ayuc ytiy'ajt huidibi ca' pin nejhuüy huinjihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ijxy Juan jada y'ayuc etz ijxpejt. ²E Juan yejcy tiy'ajt janchypí tüg'óciy jadu'n nej anajty ti huin'ixy ti huinmidoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuiyi.

³Janch jotcujc je' pinjaty capxp jada necy etz pinjaty mido'mbije jada Dios y'ayuc huidibi Juan nidiy'ajtpy etz ñajtcapxiyb. E jotcujc je' pinjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñyii yjada'ñyii.

**Juan nijayiy huixtujc'itpi
mibijcpidijc**

⁴Iich Juan nijayiybich yam je mibijcpidijc huixtujcpicypí huidibi

yajpatp jim Asia naaxjot. Huen Dios etz je huixtujcpi espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotcujc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵Huen Jesucristo may'ajt oy'ajt tunipy miid miich ajcxy etz xymóoygixipy jotcujc'ajtin. Jesucristo je huidibi tiydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcim xyjihuiyim, ti xyñihuaanim miid ñi'py ma je tzaachypí huidibi mihuaad'ajtim miid ajt nbocy ycixpi. ⁶Jesucristo ti xycötujcmooyim etz ti xytungmooyim miid Dios Teedy, huidi yi' yteedy'ajtpy. Jadu'n iich ajcxy ndung etz ngötujcin nipaady nej je tung etz cötujcin huidibi reydiyc etz teedytije ajcxy ymiid. Huen Jesucristo y'idipy cómay huinixii huinitiendo etz huen yi'

y'ane'min cōtujcin y'idipy huinixii huinĩtiempo. Jadu'n jada. Amén.

⁷Cuendtungix iich n'ayuc, iCristo miinaamb jocjoty e tũg'óciy je mayjāy y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypijc. Tũg'óciy naaxhuiñyāy yjihuĩhua'ñ yāxa'ñ ytaja'ñ ymaya'ñ miid je'ycixpi. Jadu'n jada. Amén.

⁸Jadu'n je mijpi Dios huidibi tũg'óciy mic'ajt miid ymina'ñ: —Iich je' huidibi yajtzondacp je naaxhuiñybi, je tzajp etz je huidibi jaccogixiyyb. Jadu'n iich nej letra A huidibi yajzondacp je alfabeto etz je letra Z huidibi cogixiyyb ma je alfabeto. Iich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yi Cristo oybi ymijity

⁹Iich Juan, miich ajcxy mmigũg, quipxyi miid miich ajcxy nminaxy nyajnaxyich ayo'n tzaachypi. Quipxyi miid miich ajcxy ndzināyich ma Dios y'ane'my. Etz quipxyi miid miich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim iich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuiyim.

¹⁰Jadu'n tũgtecy ti njatyich, hue' anajty tũg domingo xii co iich Dios n'ojadajtyich, e Dios yjihuĩ'ñ ymic'ajt ti anajty xymimadactayich njot nhuinma'ñich. Chi nmidooyich jixci'py'amy tũg huidibi mic capx, jadu'n yi' ycapxin nmidooyich nej tũg trompeta yxũxy. ¹¹Chi

je huidibi xymigapxpich anajty ymina'ñ:

—Iich je' huidibi yajtzondacp etz je huidibi yajcogixiyyb tũg'óciy tijaty ya naaxhuiñybi etz tzajpjoty. Jadu'n iich nej je letra A huidibi yajtzondacp je alfabeto etz je letra Z huidibi yajcogixiyyb je alfabeto. Cojaay miich ma tũg libro huidibi mhuin'ijxyp, e quex je necy jim Asia naaxjot ma je huixtujc picypí mibijcpidijc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

¹²Chi n'ijxhuimbityich n'ixa'ñich pin iich anajty xymigapxpich. Co nnayji'ijxich, huin'it nhuin'ijxyich huixtujc candelero ac tim oori. ¹³E cujc'amy ma je huixtujc candelero nhuin'ijxyich tim jadu'n nej je jāy huidibi tzoon tzajpjoty (je Cristo), yxoxyity miid tũg huit yjādy anajty mabaad ytecy, e yhuĩñity ma ycaach miid tũg oorihuiñ. ¹⁴Yi' ycohuajc etz ycōhuay janch poob, jadu'n nej lana huidibi janch poob, jadu'n nej nieve ypoobity, e je yhuĩñ jadu'n nej jiinye'n. ¹⁵Je' ytecy tim jadu'n nej latón huidibi janch oy, nej jihuĩy jijnjoty ornojoty yam ypidzimy. E je ymiydaacin janch mic, tim jadu'n nej canaag mijñii y'a'iich y'agimimy. ¹⁶E ymiid anajty ma a'oygi' huixtujc madza'. E ypidzimy ma y'ahuac tũg espada mejtz'adu'm'amy yjiipity. E yhuĩñyjiip jadu'n anajty nej xii janch mic y'añ.

¹⁷Co je' nhuin'ijxyich, chi janch ögy oy ngidāgyich ma ytecy ymijc, chi xycinixajyich miid y'a'oygi', chi xyñimaayich:

—Ca' mdzigy; iich je' huidibi jayijp'ajtp ya naaxhuiñ etz

tzajpjoty etz iich je' je huidibi cogixihuamb. ¹⁸Jugy'ajtpich; ti n'ögyich, e ti njugypicyich jadüg'oc, e jugy'adipich huinixii huinitiempo. Nmiidich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuüy nmiididyich je öcpi it ahuaazti. ¹⁹Cojay cham tijaty mhuin'ijxpy mhuinmidooyb, jadu'n nej huidibi tunaanip jadaanip jadachambi xii tiempo, etz huidibi tunaanip jadaanip jacjiini. ²⁰E jadu'n yhuimbidzimy je tiy'ajt janchypi huidibi ca' pin nejhuüy maabi je huixtucpi madza' tiibi mhuin'ixy ma iich n'a'oygi', etz je huixtucpi oricandelero. Je huixtucpi madza', je' je' je ángeles ajcxy huidibi cogapxy'ajtp miid Dios ycixpi ma je huixtucpicypipi mibijcpidijc. E je huixtucpi candelero huidibi ti m'ixy, je' yi' je huixtucpicypipi mibijcpidijc.

**Je ayuc huidi yajmoy yi
mibijcpidijc jim Efeso**

2 Nijayi' miich je ángel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n yminañ je huidibi huixtuc madza' miid ma y'a'oygi', je huidibi jim yajpatp agujc'amy ma je huixtucpi candelero, je' jadu'n minamb: ²Hich nejhuüybich tüg'óciy ti miich ajcxy mdumy, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuüybich co ca' m'ocmimexctugaani ajcxy jibicjäydijc, e ti m'ijxmajtcixy je ajcxy huidibi naydijip co Cristo ti huin'fjxigixy, per ca' je' ajcxy ytudägyity, e miich

ajcxy ti mnejhuüy co ajcxy ooy y'aniidaaccixy. ³Nejhuüybich co ooy ayo'n mij miich ajcxy mminajxcixy myajnajxcixy miid iich ycixp, etz ooy mij mecxtujcin ajcxy myajtungixy, etz ooy janch mic mdungixy miid iich ycixp, e ca' ti mmidzjipigixy iich ndung. ⁴Per nejhuüybich ma miich ajcxy mdundigoy. Ca' miich ajcxy xyajmij'atyich mijcjee, jadu'n nej anajty xyajmij'atyich ajcxy mijcjee co oga'n ajcxy mibijcy. ⁵Miid jada ycixpi jäymetz miich ajcxy ma oy m'agänajxcixy. Jothuimbijtcix, e tungix nej anajty m'octungixp co oga'n ajcxy mmibijcy. Pen ca' ajcxy jadu'n mdungixy, chi tzojc nícxibich ma miich ajcxy, chi huingbi nbidägiybich ma miich ajcxy xyjapaady, tim jadu'n nipaady nej jihuüy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶Per njäygidaacypich jadu'n nej miich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinma'n. Nej je nicolaítas ajcxy ytungixy, miich ajcxy ca' mjäygidaaccixy e nañ jadu'n iich ca' njäygidägyich. ⁷Pinjaty ytädzac miid huen amidoo'ity nej je Espiritu Santo yminañ ma je mibijcpidijc huidibi yajpatp xi ya. Pinjaty madacp ma ymibijcin, iich yi' nmöhuipy tzinaayin jugy'ajtin ma Dios y'ane'my, jaydëb jotucujc chinähuipy ma Dios y'it, jadu'n nipaady nej jihuüy ajcxy jicxxy je quipytiim ma Dios y'it huidibi jugy'ajtin yejcp.”

**Je ayuc huidi yajmoy yi
mibijcpidijc ajcxy jim Esmirna**

⁸Nijayi' je ángel, je cogapxy'ajtpi huidibi yajpatp ma je mibijcpidijc jim Esmirna: “Jadu'n yminañ je

huidibi yajtzondac je naaxhuiñybi etz tzaip etz huidibi cogixihuip, je huidibi o'c e yjugy'aty jadüg'oc: ⁹Hich nejhuiybich tüg'óciy ti miich ajcxy mdumy. N'ijxcaypyich nnejhuiybich je m'ayo'n mjetmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuiybich co ayooob jäy miich ajcxy, per miid miich ajcxy Dios y'oy'ajtin, e jadu'n nipaady miich ajcxy nej comeeñdijc. Nejhuiybich co nijējity jäy miich ajcxy xyñigapxyp xyñ'ojiiyb. Ñaydijyii ajcxy co yjudíojäyity, e ca' yjanchity. Hue' ajcxy miid y'ijtcixy je mujcu'. ¹⁰Ca' ni ti mdzigy miich ajcxy nej mjadaangixy m'ayoohuaangixy. Yi mujcu' miich ajcxy nijējity xyajpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xii. Ijtcix tudägy mabaad ajcxy m'öccixy. E iich miich ajcxy je jugy'ajtin huinixiibi nmöhuipy jadu'n nej premio co ti mmadaaccixy ma mmibijcin. ¹¹Pinjaty miid ytädzac, huen mido'mbijccixy nej je Espíritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'ögañ mimejtz'ocpi."

**Je ayuc huidi yajmoy yi
mibijcpidijc jim Pérgamo**

¹²Nijayi' je ángel huidibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n yminañ je huidibi

y'espada miid mejtz'adu'm'amyb yjijpity: ¹³Hich nejhuiydaaybich jadu'n nej miich ajcxy mdzinaaygix mjugy'ajtcix. Nejhuiybich co miich ajcxy mdzinaaygixy mjugy'ajtcixy ma tüg cajp ma je mujcu' y'ane'my. Per mi'ijtyñi je nxiijich, e ca' m'ixmach je mmibijcin ma iich. Ni mga'ixmajch je mmibijcin je huin'it xii co Antipas yaj'o'ci jim ma miich ajcxy, tüg iich nmigüg, je tudägy pi testigo, jim je' y'o'cy ma mujcu' chinäy. ¹⁴Nmiidich tigati huidibi ca' n'oy'ixyich ma miich ajcxy huidibi mdumy ajcxy jim Pérgamo. Nijējity miich ajcxy ca' m'ixmadza'ñ je Balaam y'ixpijcin, je huidibi yaj'ixpijc jecy'ajty co huen jicxcixy je huidibi anajty tzaadzech quipychet ti yajhuindzigiiygixy. E nañ jadu'n yaj'ixpic co huen tundigooygixy miid huingbi töxyjäy. ¹⁵Nañ jadu'n miich ajcxy mmiidity nje' jäy huidibi ajcxy ca' ixmadzaangixy nicolaítas y'ixpijcin, je ixpijcin huidibi iich ca' ndim'ixa'ñich. ¹⁶Paady jothuimbijtcixy miich ajcxy, yajtigajtzni ajcxy mjet mhuinma'ñ. Pen ca' jadu'n mdunipy, nícxibich jim tzojc ma miich ajcxy. Chi jada' ndziptunipyich miid yi' ajcxy huidibi midundigooyb iich ngötujcin huidibi ngapxpich. Hich n'ayuc jadu'n nipaady nej espada. ¹⁷Pin ytädzac miid, huen mido'mbicy je ayuc huidibi je Espíritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, iich yi' nmöhuipy oy'ajtin huidibi Dios yjē'ajtpy. Jada oy'ajt jadu'n

nipaady nej maná huidibi yüch ijtp ma Dios chinaydac. Nañ jadu'n iich yi' nmöhuibich tüg pi'cpoobtzaa, e ma je poobtzaa jim yaayity tüg xii jemybi huidibi ca' ni pin ijxcabipy, jëyi janchtiy ijxcabip je xii pin anajty cöbijcp je tzaa.”

**Je ayuc huidi yajmoy yi
mibijcpidijc jim Tiatira**

¹⁸Nijayi' je ángel huidibi cogapxy'ajtp ma je mibijcpidijc jim Tiatira: “Níma' ajcxy, jadu'n je Dios y'lung ymina'n, je huidibi yhuin miid jadu'n nej jihuüy jiinye'n, e ytecy jadu'n miidity nej bronce tiibi ytoyhuäch ma jiin: ¹⁹Jadu'n yi' ymina'n: Nejhuüybich tüg'óciy ti ajcxy mdumyb. Nejhuüybich jadu'n nej miich ajcxy mijcajee myajmij'ajtcixy Dios etz mdzojccixy mjihuüygixy ymigügtijc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuüybich co cham nigi mdungixy ma Dios ytung, ca'ydi jadu'n ajcxy nej myajtzondacy. ²⁰Ji tüg huidibi miich ajcxy mdumyb huidibi iich ca' n'oy'ixyich. Mdzachmimexxtujccixy yi töxyjäy Jezabel huidibi naydijp co ycapxyp Dios y'ayuc e ca' yjanchity. Je' yajniidigooyb yajtüdigooyb iich ndumbi miid anii. Jadu'n je' ymina'n co jëbi huingbi töxyjäy migapxtigooygixy e co jëbi caaygixy jiicxcixy je huidibi ajcxy yajhuindzigüiyb quipychech tzaadzech. ²¹Ti iich je Jezabel nmöy tiempo co ixypy yjothuimbity, per yi'

ca' ixmadza'n yjibic-huinma'n.

²²Jadachambi nyajcähua'nich je Jezabel cijx'am miid pa'm, e jadu'n ajcxy nmöhua'nich ayo'n je yëydijc ajcxy huidibi miid chachtundigoy. Jadu'n ndunipyich pen ca' ajcxy yjothuimbijtcixy nej ajcxy chachpadungixy je jibic-huinma'n huidibi je Jezabel ymiid.

²³E nyaj'öctähuibich tüg'óciy ajcxy pinjaty panicxp cixyjt huinjot je Jezabel y'ixpijcin jigix nidüg'óciy je mibijcpidijc ajcxy nejhuüydähuipy co iich je' nejhuüydaayb tüg'óciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴Per jacjadyi miich ajcxy jim Tiatira ca' mbanicxcixy mbayöygixy Jezabel y'ixpijcin, e ni ca' mmijpidaaccixy huidibi ajcxy ytiipy mujcu' y'ixpijcin huidibi tzip huinjihuüyb. Iich miich ajcxy nimaayb co ca'p iich miich ajcxy huingbi ixpijcin njacmóoygixipy. ²⁵Mi'ijtcixy je Dios ytiy'ajt huidibi miich ajcxy miid, ixti cooni anajty nhuimbityich. ²⁶Pin madacp ma ymibijcin etz pin cuydumb iich ndiy'ajt mabaad anajty je' y'ögy, iich je' nmöhuibich je cötujcin, jaydëb ane'my naaxhuüñjäy ajcxy. ²⁷Iich je' nmöhuipy je ane'min cötujcin ma naaxhuüñjäy huidibi Dios Teedy, iich nDeedy, ti xymöyich. E je' ane'mipy miid Dios ymic'ajt. E je' yajhuindigoydähuipy naaxhuüñjäy y'ane'min, tim jadu'n nej jäy püy pochtu'tz miid pujxtajc. ²⁸Nañ jadu'n iich je' nmöhuipy iich nmic'ajt huidibi nipaady nej je

madza' jayhuixtujc. ²⁹Pin ytādzac miid, pin midoohuamb, huen midoy nej je Espíritu Santo ymina'n̄ ma yi mibijcpidijc nidüg'óciy."

**Je ayuc huidi yajmoy yi
mibijcpidijc jim Sardis**

3 Nijayi' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: "Jadu'n ymina'n̄ je pin miid je huixtujcpi Dios y'espíritu, huidibi miid je huixtujcpi madza': Hich nejhuiyb ti mdumyb. Nejhuiybich co cōmay ajcxy m'ijtcixy co mmiidity yjugy'ajtin huinixiibi e ca' yjanchity. Jadu'n miich ajcxy nipaady nej öcpi. ²Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy mjacmiidity. Ti iich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³Jäymejtzcootcixy je Cristo ytiy'ajt je tiibi m'ixpijccixy, je tiibi mmidoogixy. Panicxcix Cristo ytiy'ajt e jothuimbijtcixy ma yi oybi. Pen ca' mgüenditungixy yi mmibijcin, nicxibich ma miich ajcxy jadu'n nej tüg meetzpi, ni mganejhuíhuíygixipy anajty nnicxyich. ⁴Miich jacmiidni mibijcpi ajcxy jim Sardis huidibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuíy ajcxy miidity poob huit huidibi ca' yjibicíy. Yi' ajcxy xymiid'idipich miid huädz jot huädz huinma'n̄, tim jadu'n nipaady nej ypoob huit ajcxy miidity, com ajcxy ypadyii

jadu'n. ⁵Pin mimadacp cuyduñ etz mijpidägy Dios y'ayuc ytiy'ajt, ymiid'adipy ajcxy je huätzpi jot huinma'n̄, huidibi jadu'n nipatp nej poob huit ajcxy miidity. E ni ca' ajcxy yxii yajjödzip ma je libro ma ycojaayity je tudägyipi jäy ajcxy yxii. E iich yi' ajcxy ngapxquëxíccixy yxii ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶Pin midoohuamb, pin ytādzac miid, huen midoy nej je Espíritu Santo ymina'n̄ majaty je huidibi ajcxy Dios y'ayuc ytiy'ajt mibijcip."

**Je ayuc huidi yajmoy yi
mibijcpidijc jim Filadelfia**

⁷Nijayi' je ángel huidibi capxy'ajtp ma je mibijcpidijc jim Filadelfia: "Jada ayuc tiy'ajt ñgapxyp je tügpajcpi huätzpi, tügpajcpi janchypi, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatzip e co yaj'ahuäch ni pin ca' huaad yaj'aducy. Je huidibi yaj'adujcp e co yi' yaj'aducy, ni pin ca' huaad yaj'ahuäch: ⁸Cuenditungix nej nmína'n̄ich: Hich nejhuiybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi ni pin ca' huaad yaj'aducy. Nejhuiybich co hueeni Dios yjihuí'n̄ ymic'ajt miich ajcxy miidity. Per ti mguydungixy iich n'ayuc, e ca' nxiijich xycoyützi. ⁹Cuenditungix nej nmína'n̄ich. Yi' ajcxy huidibi mijpidacp Satanás y'ayuc, je huidibi aniidacp ajcxy co ñaydíjigixy judíojäy, e ca' yjanchity.

hich yi' ajcxy nmimadägibich jigix yi' ajcxy miich xyhuingoxtinähuiipy xyajmij'adipy. E chi nejhuihuip ajcxy co hich miich ajcxy ti ndzocy. ¹⁰Miid co ti myajtungixy mecxtujcin ma mdzinaayin, ti mguydungixy iich n'ayuc n'ane'min. Paady iich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'n'ijxcixy ajcxy. Miinipy je xii je tiempo mina je mujcu' jot'ixipy huinma'n'ixipy tüg'óciy je mayjäy huidibi yajpatp ya naaxhuiñ. ¹¹Hich tzojc nnicxa'nich jii by naaxhuingixy. Mi'ijtcixy yi Dios y'ayuc huidibi miich ajcxy miid jigix ni pin xycapijci ajcxy mbremio, huidibi ti mganar'ajtcixy ma Dios. ¹²Pin mimadacp cuyduñ Dios y'ayuc ytiy'ajt etz cuyduñ yajxon, iich yi' nbidägibich mij'ane'mbi ma iich nDios y'it, jadu'n yi' nipaadip nej tüg pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayiiyibich ma yi' ñinix iich nDios yxii, e nañ jadu'n njáayibich je iich nDios ycajp yxii, je Jerusalén jemybi huidibi tzoön tzajpjoty ma Dios yajpaady. E nañ jadu'n njáayibich nxii jemybi ma yi' ñinix. ¹³Pin ytädzac miid huen midoy ti je Espíritu Santo ñigapxyp ma tüg'óciy je mibijcpidijc.”

**Je ayuc huidi yajmoy yi
mibijcpidijc jim Laodicea**

¹⁴Nijayi' je ángel huidibi cogapxy'ajtpi ma je mibijcpidijc jim Laodicea: “Jadu'n ymina'n je huidibi janchip tudägyip, je huidibi tudägy yejcp Dios ytiy'ajt

e ca' yajtigach y'ayuc, je huidibi yajtzondac tüg'óciy tijaty huidibi Dios ti oyduñ. ¹⁵Nejhuiyibich nej mdungixy. Nejhuiyibich co miich ajcxy mibijccixy huenjaty, ca' myajtigoydaygixy yi mmibijcin, e ni ca' ooy mij mmibijccixy. Jadu'n miich ajcxy nipaady nej nii huidibi ni ca' ytiicity, e ni ca' y'anity. Jac'oy ixypiy co ooy mij mmibijccixy, o co ca' ixypiy mdimmibijccixy. ¹⁶Miid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycixpi iich miich ajcxy njijpcogapxihiipy miid je ndzip n'éjcinich, tim jadu'n nej jäy ajcxy ixtzuuy huidibi y'ahuac yca'tzojcpy. ¹⁷Miich ajcxy minamb co ooy ajcxy mgomeeñity, ooy ajcxy mij mdzinaayin mjugy'ajtin mmiidity, e ca' ti ajcxy myajmayajtcixy, e ni ca' miich ajcxy nejhuiyigixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huidibi nihuädz ixhuädz huidijtp. ¹⁸Paady iich miich ajcxy nimaaygixy co copicy ajcxy mbaadip ma iich Dios ytiy'ajt janchypi, huidibi jadu'n nipaadipy nej jihuüy ajcxy mjuuygixy huädz oori ma iich, huidibi ti y'oybidzimy miid jiiñ jigix mgomeeñ'ajtcixip. Nañ jadu'n iich miich ajcxy nnimaaygix co copicy ajcxy mbáatcixip pocyhuinmeecxin ma iich, huidibi jadu'n nipaady nej jihuüy huit oyjatypi poopjatypi mjuuygixy ma iich, jigix mxójcixipy mninix ca'ydi tzo'ydu'n mbáatcixipy.

Nañ jadu'n iich miich ajcxy nnimaaygix co mbaadip tiy'ajt ma iich nlibro, huidibi jadu'n nipaady nej jihuüy huindzooy mjuuygixy, jigix mdzoydúngixipy mhuin e huin'it ajcxy m'íjxcixipy huädz. ¹⁹N'ojypich etz ndzaachytumyb tüg'óciy pinjaty ndzojcpyich njihuiybich, paady ycixpi miich ajcxy mhuindina'mjijptina' mic iich ndiy'ajt etz jothuimbijtcix nej mbocytungixy. ²⁰Cuenditungix nej cham nnimaaygix. Jadu'n nipaady nej jihuüy ndinäyich ma nidüg nidüg jäy ytijc'aguu e ngojxnojcich ajcxy ytijc agi'. Nbijctzooybich co xyajtigihuibich ajcxy ma ytijcin. Pinjaty xyyöcmidoobich, e yaj'ahuäch ytijc, tigihuibich ma yi', e cayipich miid yi', e yi' miid iich. ²¹Pinjaty cuydundaayb Dios y'ayuc ytiy'ajt, iich je' nmöhuipy it lugar tzajpjoty quipxyi miid iich ma iich n'ane'mdac. Ti nguylundaayich Dios y'ayuc, e nmiidich it lugar ma iich nDeedy y'ane'mdac, paady ycixp jëbi nmöhuibich miich ajcxy it lugar ma nyajpaadyich. ²²Pin ytädzac miid, pin midoohuamb, huen midoy huidibi je Espíritu Santo ycapxyp majaty mibijcpidijc huidibi canaagpicy yajpatp.”

**Hibaatcixy capxpaatcixy yi Dios
huidibi tzajpjoty tzinaayb**

4 Co jada jadu'n yjajti, chi nhuindiicxyich tzajpjoty, e nhuin'ijxyich tüg tijc aguu ahuädz jiiby tzajpjoty. E nmidooyich tüg ayuc janch tim jadu'n nej tüg trompeta yxüxy huidibi iich anajty jayijp ti xy'ocmigapxpi, xyñimäyich:

—Pet ya ma iich, cham nyajni'ixihua'n tijaty copicy tunaanip jadaanip co anajty jadayaabi xii tiempo ñaxy.

²Chi Dios yjihui'n ymic'ajt xymimadactaayich njot nhuinma'ñich, e nhuin'ijxyich tüg ane'mdac jiiby tzajpjoty. E ma je ane'mdac jim anajty tüg iñäy. ³E je huidibi anajty jim iñaayb ma je ane'mdac, jadu'n anajty yquëxigy nej tüg tzaa janch oybi janch adiicxp. E jühuidity ma je ane'mdac je Dios yhuätz'ajt quëxigy nej tüg i'ñich janch oycolor huidibi janch adiicxp nej tüg tzaa tzuxjatypi. ⁴Nañ jadu'n jühuidity ma je ane'mdac jiiby anajty iipx madaax silla, e ma je silla iñäy iipx madaax mijjäy, ac poob huit miid. E ymiid anajty ajcxy ma ycohuajc coroni ac tim oori. ⁵Ma je ane'mdac anajty ypidzimy huidzuc, e ooy anajty enee yjidijtin ñe'my. E ma je ane'mdac huinduu jiiby anajty Dios yjihui'n ymic'ajt je huixtucpi, huidibi quëxig nej huixtuc tzinhuaty huidibi ooy mic ytiicxy. ⁶E je tigot ma je ane'mdac huinduu jadu'n quëxigy nej vidrio mejy, janch huädz janch adiicxp.

E cujc'amy jühuidity ma je ane'mdac midaax iyujc huidibi miid mayhuiin jahuinduuy jajixcipy. ⁷Je midügpi iyujc tim jadu'n anajty nej tüg jamgaa. Je mimetzpi iyujc tim jadu'n nej tüg huajmang. Je midugiigpi tim jadu'n anajty yhuiñyijp nej jäy. Je mimadaaxpi tim jadu'n nej me'ty yqueec-huidityin. ⁸Je nimidaaxpi iyujc ymiid anajty ajcxy nidüg nidüg tudujc yqueec,

e ymiid anajty ajcxy yhuin
queecnigixy etz queecpa'tci'py. E
ca' anajty ajcxy ypocxy xiim tzuum,
chachminaangixy:

Santo, Santo, Santo, je Huindzin
Dios huidibi tüg'óciy
nejhuiydaayb, huidibi tüg'óciy
mic'ajt miid, je huidibi anajty
ji'ajtp, je huidibi cham ji'ajtp,
etz je huidibi miinaamb.

⁹Je iyujc ajcxy huin'iigixy etz
huindzigiigixy etz yajmij'ajtcixy
Dios, etz yajnajxcixy Dioscoyuyip
ma Dios je huidibi anajty iñaayb
ma je ane'mdac, je huidibi tzinaayb
jugy'ajtp huinixii huinitiempo, e ni
camina y'ögipy. ¹⁰Co je iyujc ajcxy
jadu'n ytuñ, chi je iipx madaaxpi
mijjāy ycojxtinaydaaccixy ma je'
yhuinduu huidibi anajty iñaayb
ma je ane'mdac. E ooy anajty
huindzigiigixy je huidibi tzinaayb
huinixii huinitiempo. Pidaaccixy
anajty ajcxy ycorona ma je'
yhuinduu, cham chachminaangixy:

¹¹Miich, iich ajt nHuindzin,
iich ajt nDios, miich
mihuaad co mmiidity
tüg'óciy oy'ajtin mij'ajtin
etz mic'ajtin, mihuaad co
miich nyajcōmayip, mihuaad
co miich miid'ity tüg'óciy
mic'ajt etz mij'ajt. Jadu'n
miich mihuaad, com miich
ti myajcojy, ti myaj'abadīy
tüg'óciy huidibi ji'ajtp.Com
miich jadu'n ti mdzocy, paady
ycixpi tüg'óciy tijaty ji'ajttāy.

Je libro etz je Dios y'ung, je Cordero

5 Chi jada' nhuin'ijxyich ma
je huidibi anajty iñaayb
ma je ane'mdac miidity anajty

ma y'a'oygi' tüg libro abugucy,
yjaayity jotjoty'amy etz nigixy'amy,
yco'aducyity miid huixtujc selli.

²Chi nañ jadu'n nhuin'ijxyich tüg
ángel huidibi mij cōtujcin miid,
yajtiy miid ycapxin janch mic:
—¿Pin jada' janch tudāgyip
co yaj'ahuädzip jada libro etz
migiidzyidāhuipy yi yselli?

³Ni tzajpjoty, ni naaxhuiñ,
ni naaxpa'tci'py ycacá'ity pin
tudāgyip huidibi mihuaad je libro
co yaj'ahuädzip, o oy nigoodi'ajty
ja'ixaanip. ⁴Iich janch yaaxpich
miid tajiñ mayin anajty, com
ca' anajty yajpaady pin je libro
mihuaad co yaj'ahuädzip, o oy
nigoodi'ajty huindiicxip. ⁵Chi nidüg
je mijjāy xyñimaayich:

—Ca' myäxy. Chi je' je mic'ajt
miidpi ma yi judíoñäy, je David
y'ap y'oc huidibi nipatp nej tüg
ama'ycaa, yi' ti mimadactäy
tüg'óciy jibicpi. Yi' mihuaad
yi libro yaj'ahuädzip, etz
miguejyidāhuipy je huixtujcpi yselli.

⁶Chi nhuindicxpejtyich, e
agujc'amy ma je ane'mdacin, etz
agujc'amy ma je midaaxpi iyujc,
etz agujc'amy ma je mijjāydijc
ajcxy, jim anajty ytinäy je Dios
y'ung, je Cordero. Ooy anajty
ñiguëxigy chaachi'au nej anajty
ayo'n tzaachypi ti yajnaxy. Ymiid
anajty huixtujc ymu'n, e huixtujc
yhuin, je' je' je huixtujcpi Dios
yjihui'n ymic'ajt huidibi yquejx
huindu'my naaxhuiñ. ⁷Chi je
Cordero, je Dios y'ung, ninicxy
je huidibi anajty iñaayb ma je
mij'ane'mdac, e chi oy cychoy je
libro huidibi je mij'ane'mbi anajty
ymiid ma je a'oy'amybi yci'. ⁸Co

je' anajty ti ciychoy je libro, chi je midaanxpi iyujc etz je iipxmidaaxpi mijjāy ycojxtinay'ahuiyday ajcxy ma je Dios y'ung, je Cordero, yhuinduu. Ymiid anajty ajcxy nidüg y'arpa etz oori copi ujtzity miid poom, je' je' anajty nipaady nej ajcxy chajpcapxy capxy je huidibi ajcxy mibijcp Dios. ⁹Janch y'iiyb anajty ajcxy iy jemybi, yminaangixy:

Miich mihuaad co mgiiygy yi libro, e mmiguejydaayi je huixtucpi yseli. Com miich ti myaj'ögyii, ti mgojuy jäy ajcxy ypocy ma Dios miid mgi'mni'py. Ti mgojuy ma Dios nidüg'öciy jäy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi capity huen huidibi naciónity.

¹⁰Miich ti xymóoygixyich ane'min etz je tung mijpi nej huaad iich ajcxy n'ojadajtcixy nmibijctzoogixy Dios, jigix jēbi iich ajcxy n'ane'mgixy yi naaxhuin'yjäy etz n'ojadajtcixy nmibijctzoogixy Dios miid jäy ajcxy ycixpi.

¹¹Chi iich oy nhuin'ixyich e nhuinmidooyich may ángeles ajcxy ycapxin ymiydaacin jühuidity ma je ane'mdac, ma je iyujc ajcxy yajpatcixy, etz ma je mijjāy ajcxy yajpatcixy. E janch canaag millon je ángeles anajty ajcxy. ¹²Janch mic je' anajty ajcxy chachminaangixy:

Je Dios y'ung, je Cordero, je huidibi öc miid jäy ajcxy ypocy ycixpi, yi' mihuaad paadip ane'm'ajtin,

comeeñ'ajtin, xpijcin, mic'ajt, cōmayin, oy'ajt mij'ajt, etz huin'iihuin huinyaaxin.

¹³E tüg'öciy iyujc animal je huidijaty Dios ti yajcojy ti yaj'abadīy huidibi jiiby tzajpjoty, etz huibi ya naaxhuin etz naaxpa'tci'py, huidibi jiiby mejyoty, nhuinmidooyich co tüg'öciy ajcxy chachminaangixy:

Tzoc huin'iihuim tzoc cōmayim, tzoc mooyim oy'ajtin etz mij'ajtin huinixii huinitiempo je Dios y'ung, je Cordero, etz je huidibi iñaayb ma je ane'mdaacin.

¹⁴Je midaanxpi iyujc anajty chachminaangixy:

—Jadu'n huen tuñyii jadyii. Amén.

Chi nañ jadu'n je iipxmidaaxpi je mijjāy ajcxy ycojxtinaygidactay, chi ajcxy ooy huindzigiīy patjihuii je huidibi huinixii huinitiempo tzinaayb.

Je huixtucpi selli

6 Huin'it nhuin'ijxyich je Dios y'ung, je Cordero, quejtzciich tüg selli ma je huixtucpi chi nmidooyich, co nidüg je midaanxpi iyujc ycapxy, jadu'n nmidooyich nej enee yjidity, chi ymiñ:

—Min ya, e chi m'ixipy.

²Chi nhuindixpejtyich, chi nhuin'ijxyich tüg poob cohuay. E je huidibi yaj'iñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coroni co yrey'adipy. Chi jada' choñ tziptunaangixy jigix jacmimadägiipy ymidzip.

³Co je Dios y'ung, je Cordero, yaj'ahuaach je mimetzpi selli ma

je necy, huin'it nmidooyich je mimetzpi iyujc ma je midaaxpi ymina'n:

—Min ya, e chi m'ixipy.

⁴Chi ypidzimy jadüg cohuay tzaptzpi ycolor. E huidibi yaj'iñaayb je cohuay chaptzpi, yc'idigiïyi cõtujcin co je naaxhuiñyäjy canayyajotcujc'adiib ajcxy, e ñayyaj'öcigixipy miñ xyipy. E yajmooy tüg espada mijpi.

⁵Co je Dios y'ung, je Cordero, agiïtztuudy je midugiïgpi selli ma je necy, chi nhuinmidooyich je midugiïgpi iyujc ma je midaaxpi, ymina'n:

—Min ya, e chi m'ixipy.

Chi nhuindixpejtyich, chi nhuin'ijxyich tüg cohuay tzixypi. E je huidibi anajty yaj'iñaayb je cohuaychixy, ymiid tüg pujxtzim ma yci'. ⁶Huin'it nhuinmidooyich tüg ayuc choñ ma je midaaxpi je iyujc ajcxy yajpaatcixy, ymina'n:

—Tüg denario meen chohuiy tüg libra trigo; nañ jadu'n tüg denario meen chohuiy tudujc libra cebada, ca' myaj'ayoohuipy aceite etz vino.

⁷Co je Dios y'ung, je Cordero, yaj'ahuaach je mimadaaxpi selli ma je necy, chi nhuinmidooyich co je mimadaaxpi iyujc ma je madaaxpi ymina'n:

—Min ya, chi m'ixipy.

⁸Huin'it nhuin'ijxyich tüg cohuay nitzuxy pu'tz, e je huidibi anajty yaj'iñaayb je cohuay, hue' anajty yxii öcpi. Axa anajty ymiin je huidibi ane'mb je it ma je öcpi ñimucy. Chi ajcxy yajmoy cõtujcin je huidibi yaj'iñaayb je cohuay, jigix yaj'ó'ccixipy je tügpicypi ma je madaaxpicypi naaxhuiñyäjy ajcxy.

Chi yaj'ögip ajcxy miid tzip, miid yuuba'm, etz miid iyujc ahua'nbi huidibi ya naaxhuiñ.

⁹Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'öcpat miid Dios y'ayuc ycixpi, huidibi anajty ajcxy capxhuäxcixp etz nidiy'ajt'ajtcixp Dios y'ayuc. ¹⁰Je' anajty ajcxy huidibi yaj'ögy patp miid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi myejc ma iich ajcxy. ¿Jadu'ñyi jada' mjac-huäcxiba'n mina anajty yi jäy ajcxy mdiydunaangixy mdzaachytunaangixy miid ypocy ycixpi huidibi xyaj'o'c iich ajcxy, yi' ajcxy huidibi tzinaayb naaxhuiñyáxy?

¹¹Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy miid miich ajcxy tumb ma Dios ytung, je' ajcxy huidibi yaj'ögy paadipy miid Dios y'ayuc ytiy'ajt ycixpi, tim jadu'n nej miich ajcxy ti mbaatcixy yaj'ögy.

¹²Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñyxijty, chi je xii yjajty janch tzixy, jadu'n nej tzixyhuit huidibi co'ögytjic ypidacpy, e je po' y'ahuimbijty nej ni'pyin. ¹³Chi madza' ooy yca'y naaxcixy tim jadu'n nej piidztim

tzuxpi ycäy co micpoj mixidäy.
¹⁴Chi je tzajp yjihuäcni jadu'n
 nej tüg libro'abidity. Tüg'óciy
 tungop huidibi naaxhuiñgixy
 etz huidibi mejy'agujc, cijx
 chondägy ypidictäy ma anajty
 y'ity. ¹⁵Huin'it ñayyützaayi je
 reydijc, je mįjtungmiidpidijc,
 generaltijc, comeenydijc, pinjaty
 ymic'ajt miid, je tumbidijc etz je
 midumbidijc ñayyützaayi ajcxy
 nidüg'óciy majaty tzaajut tzaa'ang.
¹⁶Tzachnimaaygixy anajty tungop
 tzaajot:

—Nīgāgootcich nīgāgootcich,
 ca'ydi iich ajcxy njac'lijxi
 yhuiñyijp je huidibi iñaayb ma
 Dios y'ane'mdac, e nañ ca'ydi
 nbáatcixyich je tzaachypi ayo'n
 huidibi yegamyb Dios y'ung, je
 Cordero.

¹⁷Com ti je xii je tiempo
 yhuaad'ajtni mina Dios etz Dios
 y'ung y'ahua'ndāgaangixy etz
 tzaachytunaangixy naaxhuiñyäjy.
 ¿Pin je' ocmimadägip ajcxy chip
 y'ejcín?

Huidibi anajty ajcxy tiy'ajtmiiid ma je Israel jäy ajcxy

7 Chi co jadu'n yjajti, chi
 nhuin'ijxyich madaax ángeles
 ajcxy ytinaaygixy ma madaax'itpi
 naaxhuiñybi ytatzcäy. Adujccixy
 anajty je midaax'it poj ca'ydi
 ypojy ya naaxhuiñ, ni ma mejy,
 ni ma quipy. ²Chi nhuin'ijxyich
 jadüg ángel ymiinüy anajty
 xiibidzimy'amy, miidity ma yci' je
 Dios juugypi yselli. Jadayaabi ángel
 ooy mic miyaaxy je jamidaaxpi
 ángeles ajcxy huidibi anajty ajcxy ti
 ycidigiiygixy je mic'ajt je cötujcín

nej huaad yajhuindigooygixy tijaty
 ya naaxhuiñ etz ma nii mejy.

³Chi je ángel yminañ:

—Ca' ti ayo'n mdungixy naaxhuiñ,
 ni ma mejy, ni ma quipy chaa, ixti
 cooni anajty Dios ytiy'ajt y'ijxpejt
 nbidaacim ma je' ajcxy yhuimbocín,
 je tiibi ajcxy huin'ixy huidibi
 tungixp ma Dios ytung.

⁴Chi nmidooyich jadu'ñyi je'
 tiibi anajty ajcxy Dios ytiy'ajt
 y'ijxpejt ti ymóoyigixy. Migo'px
 jahuixchiguipx midaax mil je'
 ñaybaati huidibi anajty ajcxy tiy'ajt
 miid ma yhuimboc ma nidüg'óciy
 Israel jäy ajcxy. ⁵⁻⁸Majmetz
 mil anajty ajcxy tiy'ajt y'ijxpejt
 miidity je Judá jäy, majmetz mil je
 Rubén jäy, majmetz mil je Gad jäy,
 majmetz mil je Aser jäy, majmetz
 mil je Neftalí jäy, majmetz mil
 je Manasés jäy, majmetz mil je
 Simeón jäy, majmetz mil je Leví jäy,
 majmetz mil je Isacar jäy, majmetz
 mil je Zabulón jäy, majmetz mil
 je José jäy, etz majmetz mil je
 Benjamín jäy.

Je mayjäy ajcxy huidibi yxoxip miid poob huit

⁹Chi jada' nhuin'ijxyich janch
 mayjäy chooñ ma canaag nación,
 hue' ajcxy canaagnax raza'adyii, e
 capxy ajcxy canaagnax ayuc, etz
 chooñ ajcxy ma canaag cajp. Hue'
 je mayjäy ytinay'ahuiyday ma je
 mij'ane'mdac huinduu, etz ma Dios
 y'ung, je Cordero yhuinduu. Janch
 mayjäy ñimujcy ma je Dios y'ung
 yhuinduu, ni pin je' anajty huaad
 camichoudäy ajcxy. Ac poob huit
 anajty ajcxy miid yxoxyity, e ymiid
 anajty ajcxy tiixy'aay ma yci'. ¹⁰E

janch mic anajty ajcxy miyaaxcixy
Dios, chachmínaangixy:

Hich ajt nDios yi' je' tūgpajc
huidibi xyajpocyhuaatzim.
Hich ajt nDios yi' je' huidibi
ane'mdaayb tūg'óciy, e nañ
jadu'n yi' y'ung, je Cordero.

¹¹E nidūg'óciy je ángelestijc
anajty ajcxy ytinaaygixy
jūhuidityi ma je Dios y'ane'mdac.
E cham je mijjāy ajcxy etz je
midaaxpi iyujc huijōj'ihuiy
ajcxy ma je ane'mdac huinduu,
huindzigiigixy yajmij'ajtcixy je
Dios. ¹²Chachmínaangixy:

Jadu'n jada. Amén. Hich ajt
nDios, je' mihuaad huinixii
huinitiempo tūg'óciy je iihuín,
je xondaacin, je oy'ajtin, je
ixpijcin, je jāygidaacin, je
cōmayín, je ane'mín, je
mij'ajtin. Amén. Jadu'n jada.

¹³Huin'it nidūgti je mij jāy ycapxy,
e xy'amidooyich:

—¿Pin jada ajcxy jada' huidibi
poob huit miid yxoxyity, e ma yi'
jada' ti choongixy?

¹⁴Chi iich je' n'adzooy:

—Huindzinich, miich mnejhuiyib.

Huin'it je' xy'adzooyich:

—Jada je' ajcxy tiibi je mij
ayo'n minajxcixy yajnajxcixy, e
ti ypocyhuaatzcixy miid je Dios
y'ung, je Cordero ñi'py, tim jadu'n
nej jihuüy yhuit ti yajhuaatzcixy
janch poob ma Dios y'ung ñi'py.

¹⁵Paady yi' ajcxy yajpaady ma Dios
chinaydac yjugy'ajttac, e ytungixy
xiim tzuum ma Dios ytiyc tzajpjoty.
E yi' Dios y'ung huidibi iñaayb ma
je mij'ane'mdac, yi' yi' mi'ijttaayb
cuend'aty ma yi' yhuinduu. ¹⁶Ca'p
ajcxy jadjihuüygixipy yuu tidzibi,

ni xii'an ycajacnōgiyib ajcxy, ni
anbi ycajacyajtzibiiyb ajcxy. ¹⁷Com
je Dios y'ung, je Cordero, huidibi
cujc'amy yajpatp ma je Dios
y'ane'mdac, je' yi' cuend'ajtp ajcxy,
jadu'n nej jihuüy cōbixy cuend'aty,
e yajnicxip ma je nii huätzpi
ymuxy huidibi yejcp jugy'ajtin.
Dios yajquēgipy yi' ajcxy ytajin
ymayín jigix ca' yjacjiiygixipy
yjacyáaxcixipy miid tajin mayín.

Je mihuixtucpi selli etz je poomjogi'n ac oori

8 Co Dios y'ung, je Cordero,
yaj'ahuaach je mihuixtucpi
sellí, huin'it y'ijty oy jahuengi cup
hora amoñi jiiyb tzajpjoty. ²Chi
nhuin'ijxyich Dios y'ángeles huixtuc
ajcxy ytinaaygixy anajty ma Dios
yhuinduu, e yajmoy ajcxy huixtuc
trompeta. ³Huin'it jadūg ángel miññ,
chi je' ytinaay'ihuüy ma mesi huinduu
ma je Dios ojadajttac. Je ángel ymiid
anajty tūg poomjogi'n ac oori. Chi
ymooyi poom may'amy huidibi jojcp. E
je poomjoc tigiüy ma Dios yhuinduu
quipxi miid juydacín nuuctacín
huidibi je jāy ajcxy ytumyib huidibi
Dios ti huin'ixy ajcxy. ⁴Ma je ángel
yci'am jim je poomjoc chooñ ñicxy
ma Dios yhuinduu quipxyi miid je
oración huidibi ajcxy ytumyib je tiibi
ypocyhuaatzcixy. ⁵Huin'it je ángel
majch je poomjogi'n, chi yaj'ujch miid
jiiñbajc huidibi anajty jim ma je Dios
ojadajttaacin, chi najtzjibibiiy naaxcixy,
huin'it ooy yajmidooy jidijtin micpi etz
huidzuc e je naax ooy yūcxy.

Je maytrompeti

⁶Je huixtucpi ángeles ajcxy
huidibi anajty miid je huixtucpi

trompeti, ñayni'ixiíy ajcxy co yajxüxaangixy.

⁷Je midügpi ángel yajxuuxy je ytrompeti, e huin'it ooy eneediitz yca'y mihuididii jiin etz ni'py. Chi oy ycäy naaxcíxy. E jahueengi cujc-huäcxy oy nögy je naax, je quipy etz je aay ujtz tzuxjatypi etz nöctay miíy.

⁸Je mimetzpi ángel yajxuxy ytrompeti, chi ooy ycäy mejyoty jadun nej tüg mijcop janch tooyb anajty miid jiin, e jahuengi cujc-huäcxy je mejy oy y'ahuimbity ni'py. ⁹E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, nañ jadun jahuengi cujc-huäcxy oy ytimyhuindigoydäy.

¹⁰Chi je midugiigpi ángel yajxuxy je' ytrompeti, e huin'it oy tüg madza' mijpi ycäy. Je madza' jadun nipaady nej tüg mijjiin huidibi nayyajcodiicxim. Je madza' oy ycäy ma jahuen cacujc-huäcxy mijnií, etz ma nii muxy. ¹¹Je madza' hue' je' anajty xii'adyii ta'm'ujtz. E je nii jahuen cacujc-huäcxy oy yjajtni ta'm, jadun yta'mity nej ta'm'ujtz, e ooy jäy may y'o'cy miid je nii ycixpi co anajty ti y'ahuimbity ta'm.

¹²Je mimadaaxpi ángel yajxuxy je' ytrompeti, e huin'it jahuen cacujc-huäcxy je xii oy yhuindigooy, e nañ jadun je po' etz je madza' jahueng cacujc-huäcxy oy yhuindigooy. E miid jadun ycixpi je po' etz je madza' yhui'mgixy jahuen cacujc-huäcxy agootz, e jahuen cacujc-huäcxy ytiicxin ocyejcní ajcxy xiim tzuum.

¹³Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'n janch mic:

—¡Ay! iNaaxhuiñyäjy ajcxy ayoobidijc! co anajty trompeti yajxüxy je jatugiigpi ángeles ajcxy, huin'it ayo'n ypada'n je naaxhuiñyäjy ajcxy, ayo'n ypadamy ajcxy, ayo'n ypadamy ajcxy.

9 Chi je migooxpi ángel yajxuxy je' ytrompeti, chi nhuin'ijxyich tüg madza' anajty ti ycäy naaxcíxy. E chi je madza' yajmoy je ahuaasti huidibi miid yaj'ahuädzip je ayoodac ma Dios cuend'aty miidity je ca'oybidijc.

²Chi je ángel yaj'ahuaach je jut ma je ayoodac, e ma je jut jiiby ypidzimy jadun nej jiinjoc huidibi pidzim ma tüg horni. ³E ma je joc ypidzimy ooy maymu' naaxhuiñyáxy chachqueec-huidijtcixy ooy, e je mu' ajcxy ymooyi mic'ajt, jadun nej ca'ty miidity ytiip. ⁴Chi je' ajcxy yajcötujcmoy co ca' ni ti aay ni ti ujtz yajhuindigóoygixipy huidibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuipy je jäy ajcxy huidibi ca' miidity Dios ytiy'ajt y'lijxpejt ma yhuimboc. ⁵Ca' ajcxy yajcötujcmoy co yjáyay'ó'ccixipy, jëyi co janchtiy ayo'n ajcxy yegipy migoox po'. E je ayo'n huidibi anajty ajcxy yejcipy jadun je' nej co ca'ty jäy yajtzaachiy miid ytiip. ⁶Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ájtciy o'cin, e cöguëgiib ajcxy je o'cin.

⁷ Je maymu' jadu'n je' anajty yquëxígy nej maygohuay huidibi ni'ixi'ijtcixp co yajnicxáanigixy ma tzíp ytuna'ñyii. Ymiid anajty je maymu' ma ycohuajc jadu'n anajty quëxígy nej oori coroni. E je maymu' yhuiniyijp jadu'n yquëxígy nej jäy yhuiniyijp. ⁸ Je maymu' ymiid anajty ycohúay jadu'n nej töxyjäy ycohúay, e ytiitz jadu'n nej jamgaa ytiitz. ⁹ E je maymu' ymiid anajty ajcxy jadu'n nej pujx huidibi miid ñinícx cohúangixy. E co ajcxy queec-huidity, ooy ajcxy yqueec yaj'amüy jadu'n chachne'müy nej je carro huidibi cohúay ajcxy yjugujcyp co ñicxcixy ma tzíp ytuñyii. ¹⁰ Je maymu' ymiid anajty ajcxy ypíxy tím jadu'n nej ca'ty ypíxy, e ma ajcxy ypíxy ymiid anajty ytíjp. E ma ajcxy ypíxy miidity anajty je mic'ajt co jäy ajcxy yajtzaachihiuipy migoox po'. ¹¹ E je maymu' je' ajcxy yrey'ajtpy je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxiiijity Apolión, hue' je yxii yhuimbizimiy: je huidibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je midudujcpi ángel yajxuuxy je ytrompeti, chi nmidooyich tüg ayuc choón ma je midaaxpi huaj mu'n ity ma je altar ac óoribi, huidibi anajty ijtp ma Dios yhuinduu. ¹⁴ Je ayuc ymina'ñ:

—Nima' je midudujcpi ángel huidibi anajty trompeti miid: “Najtzmazdi' yi midaaxpi ángeles huidibi ajcxy coxoch ijtp ma Eufates mijniiba'.”

¹⁵ Huin'it oy yajcoguejttuutcixy je midaaxpi ángeles, jigix yjäyyaj'o'ccixipy jahuen cacujc-huäcxy huidibi yajpatp ya naaxhuiñ. Je midaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶ E nmidooyich co ajcxy michoy je soldadtijc huidibi anajty ajcxy cohúaygíx. E hue' mejtz migo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyich je cohúay ajcxy, e miid je ñijäy ajcxy huidibi anajty yaj'iñaayb. E je ñijäy ymiid anajty ajcxy pujx ma ycaach, je' miid ñinícx cohúangixy. E je pujx hue' anajty ycolor tzaptz, azul etz pu'tz. Je cohúay ajcxy jadu'n anajty ycohuajc nej jamgaa ycohuajc, e ma ajcxy y'ahuac ypidzimy nej jiin, nej jiinjoc, etz nej azufre. ¹⁸ E miid jada jahueng cacujc-huäcxy naaxhuiñyjäy chach'o'cy ajcxy miid je jiin, je jiinjoc etz je azufre ycixpi huidibi anajty pidzimb ma je cohúay ajcxy y'ahuac. ¹⁹ Je cohúay ajcxy ymiid anajty mic'ajt ma y'ahuac etz ma píxy. Com je' ajcxy ypíxy jadu'n je' anajty nej xoox miid ycohuajc, e je cohúay ajcxy chach'ahua'ndaaccixy miid ypíxy.

²⁰ E je jacjadyii jäy ajcxy huidibi ca' y'o'cy miid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huidibi ytungixp. E ni ca' ajcxy ixmajch nej ajcxy je ca'oybi huindzigiigixy. Nañ jadu'n ca' ajcxy ixmajch nej ajcxy huindzigiigixy huidijaty ajcxy oyduñyip miid plata,

miid bronce, etz tzaadzech etz quipychech. Je huidijaty ajcxy y'oydumyb etz ñdzejtztuutcixy, ni yca'ijxcixy, ni ycamidoogixy, ni yca'yöygixy. ²¹E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäyyaj'o'ccixy, jadu'n nej ajcxy tzachcaxpojccixy ymigügtijc, jadu'n nej ajcxy huingbi töxyjäy tzachmigapxtigooygixy, etz jadu'n nej ajcxy chachmeetzcixy.

Je ángel miid je mutz libro

10 Nhuin'ijxyich co chooñ tzajpjoty tüg ángel micpi ñiducyity miid joc, e miidity i'ñch ma ycohuajc. Je yhuiñyijp yquëxigy nej xii. Je' ytecy jadu'n yquëxigy nej mijjiinye'n. ²E ma yci' miidity tüg libro yëphuaëcxy, e pidacy y'a'oydecy mejyhuingíxy, e y'anajtytecy pidacy naaxhuiñgíxy. ³Chi je ángel oy janch mic yaaxquency jadu'n nej tüg jamgaa yäxy. E co anajty jadu'n ti yaaxquëgy, chi oy yajmidoy huixtujc jidijtin huidibi ycapx yci'm'ayuc. ⁴Co je huixtujcpi jidijtin oy ycapxtaaygixy, chi iich anajty njaaya'ñich huidibi ti capxy. Chi nmidooyich tüg ayuc chooñ tzajpjoty xyñimäyich:

—Mi'it jada ayuc yüch huidibi yi huixtujcpi jidijtin ti capxy, ca' mjaay.

⁵Chi je ángel huidibi nhuin'ijxich co mejyhuingíxy etz naaxhuiñgíxy ytinäy, yujcxajy yci' a'oy'amybi tzajpcíxy. ⁶Chi je ángel capxcödujcy co je Dios huidibi jugy'ajtp huinixii huinitempo, je huidibi yajcojy je tzajp, je naaxhuiñybi, je mejy etz

tüg'óciy huidibi jiiby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypi ayo'n ya naaxhuiñ. ⁷Co yhuaad'ajtnip je xii je tiempo ma anajty je mihuixtujcpi ángel yxuux yajxutzondägy, chi cuyduunip je Dios y'ayuc ytiy'ajt huidibi ca'pin anajty huinjihuüy, je ayuc huidibi je Dios ytumbidijc je profetas ajcxy ñajtzcapxíy jecy'ajty.

⁸Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaayich:

—Nícx miich etz ciyig yi libro huidibi yëphuaëcxy yi ángel ymiid ma yci'. Je' je' je ángel huidibi anajty tinaayb mejyhuingíxy etz naaxhuiñgíxy.

⁹Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojiicxnax, e xyajta'mmiyip mjot e ma miich m'ahuac mjihuñhuipy päg jadu'n nej ceripäg.

¹⁰Huin'it iich je pi'clibro ngiyigy huidibi je ángel anajty ymiid ma yci', e chi iich je' ngöjicxnajxy. Ma iich n'ahuac njihuñyich janch päg jadu'n nej ceripäg. Co oy ngojiicxnajxtäyich, chi oy y'ahuimbijtni janch ta'm ma iich njot. ¹¹Chi mic'amy nyajnimayich:

—Nícx miich capxhuaëcx jadüg'oc je ayuc huidibi Dios ti xymöy, je huidibi ti mgapxhuaëcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydijc ajcxy.

Je metzpi testigo

11 Chi jada' nyajmooyich tüg paxy, jahuengi jadu'n

anajty yquëxgy jadu'n nej baari
huidibi quipx yajhuamb. Chi ajcxy
xyñimaayich:

—Pidig e quipxta' yi Dios
ytiç, nañ jadu'n quipx je mesi
ma Dios yajhuindzigy, etz nañ
jadu'n michou naag jäy ajcxy
jiiby Dios huindzigyigxy. ²Je
Dios ytiba' ahuing miich je' pidäg,
ca' mguipxipy. Com yi' yi' ti
ycidigiyi yi jäy ajcxy huidibi ca'
yjudíojäyity. Yi jäy ajcxy huidibi
ca' yjudíojäyity ymimadägamyb
ajcxy je Jerusaléngajp ma Dios
miidity tzinaydac etz ane'mamb
ajcxy jiiby huixchiguipx metz po'.
³Hich metz testigo nguexipyich ma
je cajp ma Dios miidity tzinaydac, e
yi' ajcxy capxhuäcxamb iich n'ayuc
tüg mil jametzmigo'px jatugi'px xii.
Yxoxyity ajcxy miid huit nicuyaam
ixcuyaam.

⁴Je metzpi testigo jadu'n nipaady
nej je metzpi olivo cop etz je metzpi
candelero huidibi tinaaygixp
ma je Dios yhuinduu, je huidibi
ñaaxhuiñybi ane'mb. ⁵Pen ji pin
nej jaty midundigoya'n je metzpi
testigo, je' ajcxy yajpidzimip je'
ajcxy jiin ma y'ahuac, yjicxtähuipy
yjiindähuipy je' ymidzip. E jadu'n
je' y'ögipy pinjaty anajty je metzpi
testigo midundigooyb. ⁶Je metzpi
testigo ymiid yi' ajcxy cötujc co
ahuäctüjccixity je tzajp, ca'ydi ytüy
jadu'nyí tiempo anajty iihuäxcixy
capxhuäxcixy Dios y'ayuc ytiy'ajt.
E nañ jadu'n ymiid ajcxy cötujcin
co nii yaj'ahuimbjtcixipy ni'py.
Yi' ajcxy yajtuniib yaj'jadiib
canaagnax ayo'n ya naaxhuiñ,
naag'oc anajty ytimdzójccixy.
⁷E co anajty je metzpi testigo

ajcxy yajmaaygixy ytung, chi
je iyujc huidibi anajty pidzimb
ma je ayoodac, je abismo, je' je'
tziptuunip miid je metzpi testigos
etz yaj'öctähuip je metzpi testigo.
⁸Chi je metzpi testigo ñinñcx ajcxy
yhui'mipy mijniigujc mjtügujc jim
ma je mij ciudad ma je Huindzin
Jesucristo yajcruudzpejti, je cajp
huidibi tundigooy miid Dios tim
jadu'n nej Sodoma etz Egipto
ytundigooy jecy'ajty. ⁹Nijējity
jäy ajcxy huidibi xi ya conaaxip
cogajpip, oy ypinjäyity, oy ti ayuc
capxcixy, y'ixipy ajcxy tugiig
xiijagup je metzpi testigo ñaaxnñcx
mjtügujc, e ni ca'a'ixi'huipy ajcxy
co yajnaaxtigihuiyb. ¹⁰Huidijaty
ajcxy tzinaayb ya naaxhuiñ ooy
yxondáaccixipy etz yjotcugiygixipy
miid je' ycixpi co je metzpi
Dios ytestigos ajcxy anajty ti
y'o'ccixy. Chi je mayjäy ajcxy miñ
xyipy ñaymóoyigixipy tijaty, e
ñayyajniiguéjxigixipy tijaty. Com je
metzpi yëdyjc huidibi nidiy'ajt'ajtp
anajty Dios ytiy'ajt, ti anajty ooy
ayo'n yejccixy ma naaxhuiñyjäy
ajcxy. ¹¹Codugiigxi jacup naxy, chi
Dios cijx yajjugypijctäy je metzpi
öcpí, e chi ajcxy jadüg'oc ypidigy,
e pinjaty je' iix, ooy je' ajcxy
chachchigiyy. ¹²Je metzpi testigo
huidibi nidiy'ajt Dios, midoy ajcxy
tüg ayuc janch mic jiiby tzajpjoty
anajty ñimäayigixy:

—Pejtcix yeeby cix.

Chi ajcxy ypa'ttigiyy tzajpjoty
ma tüg joc, e iixi ajcxy ymidziptijc.
¹³E janch huin'ftiy ooy naax yücxy
miid tüg mic uyx. E tüg picypí je
majc picypí jäy jim Jerusalén oy
ymijähuiiygixy. E miid je uyx ycixpi

y'o'cy ooy mayjäy, ñaybaati je öcpi huixtujc mil yëydijc. E jacjadyii jäy ooy chigiiygixy yjihuiiygixy, e ojadajtciyx mibijctzoogixy ooy je Dios tzajpjoty.

¹⁴Ti ñaxy je mimetzpi ayo'n, chi tzojc ymiiñ je midugiigpi.

Je mihuixtujcpi trompeti

¹⁵Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic yminañ:

Je ane'min huidibi ya naaxhuiñ,
yi' je' cham miid ajt
nHuindzin Dios etz yi' yCristo,
e yi' je' ane'mip huinixii
huinitiempo.

¹⁶Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuijoj'ihuiydaaygixy, e chi ajcxy ooy Dios iibaty capxpaty, yminaangixy:

¹⁷Huindzin Dios, Dioscojuyip nyajnájxcixpich ma miich, huidibi jac mic'ajt miid ca'ydi jac pin. Miich tüg'óciy mdundaayb mjaajtaayb mnejhuiydaayb. Miich je' huidibi ijtñaayb, e ti m'ijtnäy, e m'ida'ñyi, com miich ti m'ijxcugüy je mgötujcin, e ti mbidägy m'ane'min.

¹⁸Mayñaax maygajp mayñaaxhuiñyäjy ooy yjotmäty ajcxy, miid co ti xii hori paady co miich mdzaachytuna'ñ je jäy ajcxy miid ypocy ycixpi. Ti je xii je hora paady co miich mdiyduna'n je jäy ajcxy tiibi y'o'ccixy. Ti je

xii je hori paady co miich mmöhua'ñ je mdumbidijc ypremio, je mdumbidijc huidijaty najtzcapxiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigiiyip, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigooygixyp naaxhuiñyäjy ajcxy.

¹⁹Je huin'it tiempo oy Dios je ytijc y'ahuäch jiiy tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidijtin, etz njihuiiyich tüg ujx, etz ooy yca'y eneediitz mijatypi.

Tüg töxyjäy etz je ama'y tza'ñ

12 Je huin'it hora oy yquëxgy tzajpcíxy tüg ijsxpejt mijpi.

Tüg töxyjäy ñidigooyity miid xii, jadu'n nej jihuüy miid tüg huit ñimochity, e jadu'n yquëxgy nej jihuüy anajty po' yajhuäcpety, e ymiid ma ycohuajc tüg corona ac oori huidibi majmetz madza' miid.

²Jadayaabi töxyjäy hue' anajty ungmijäy'ajtp, e janch yaax tinaayb je' anajty miid je tzaachypi, miid co y'ung anajty yajma'xung'ada'ñ.

³Huin'it oy yquëxgy jadüg tiy'ajt ijsxpejt tzajpcíxy. Tüg ama'y tza'ñ janch mij, tzaptz ycolor, e miidity huixtujc ycohuajc, majc ymu'n, e tüg corona majaty ycohuajc. ⁴Je mij tza'ñ miid je' ypíxy jugujcmujcy

jahueng cacujc-huäcxy je madza' jim tzajpcíxy. Chi je' najtzyemiyday je maymadza' naaxhuiñgíxy. Je mij tza'ñ oy yhuäcxiy ma je töxyjäy yhuinduu huidibi anajty ungbadamb tzojc, chi tzüdza'ñ je pi'c'ungma'xung janch tim jëyi anajty yma'xung'aty. ⁵Chi je töxyjäy yajma'xung'ajty tüg pi'cyëdyjc, huidibi ane'mip miid Dios ymic'ajt, ymiid yi' tüg pujxtajc huidibi ijsxpejt ajt co mij ane'min miidity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶Chi je töxyjäy yqueecy ñicxy mijtigüduum, ma anajty Dios ti ñi'ixiyii y'it ylugar co jim y'idipy, e jim ymöhuiyb ycaayin y'uucin tüg mil jamejtmigo'px jatugi'px xii.

⁷Je huin'it tiempo tüg tzip yjajti tzajpjoty miid je' ycixpi. Chi Miguel huidi mij cötujcin miid, miid jadyii y'ángeles ajcxy, ooy chiptuñ miid je ama'y tza'ñ etz yi' y'ángeles ajcxy. ⁸E ca'p je ama'y tza'ñ ajcxy ymadacy ma je tzip, e ca'p je' ajcxy miid'ajty tigiycac tzajpjoty. ⁹E jadu'n Dios yajqueecy je mujcu', je ama'y tza'ñ mijjäybi, jilby tzajpjoty. Je' je' je ama'y tza'ñ huidibi xii'ajtp diablo etz Satanás, je huidibi huin'iimb tüg'óciy naaxhuiñjy. Je mujcu', je ama'y tza'ñ, miid je' y'ángeles ajcxy oy yajcötijnajxtäy ya naaxhuiñ.

¹⁰Je huin'it hora nhuinmidooyich tüg ayuc janch mic tzajpjoty choon, yminañ:

—Ti je xii je tiempo nigoody mina Dios ti nihua'ñ ti yajnidzögy jäy ajcxy ma je mujcu'; mina Dios ti yajniguëxígy yi' ymic'ajt;

mina Dios ti yajniguëxígy yi' y'ane'min; etz mina Cristo ytiigi y ane'mbi miid ymic'ajt. Com ti Dios cötijnaxy je mujcu' huidibi tzachxip iich ajt nmigügtijc, je mibijcpidijc. Je mujcu' anajty tzachxip ajcxy xiim tzuum ma Dios. ¹¹Iich ajcxy nhermanotijc ti yi' mimadaaccixy je mujcu' miid je Dios y'ung ñi'py, etz miid je' y'ayuc ytiy'ajt tiibi mibijccixy, je huidibi ajcxy nidiy'ajtcixp ma yi mayjäy. Ca' ajcxy tzigäy anajty co yjugy'ajt ytigöoygixip. Nigi ni'ixi y'ijtcixy anajty miid ymibijcin oy ytimy'ó'ccixipy. ¹²Jotcujc'ajtcix etz jotcugiiygix huidibi jilby tzinaaygixp tzajpjoty. Ayo'n ypadamyb ajcxy huidibi tzinaayb naaxhuiñgíxy etz mejyjoty. Com je mujcu' ti je' ycidägy ma miich ajcxy miid chip y'ejcín. Com je mujcu' ñejhuiyb co tim jayinjaty jahuenjaty xii tiempo jacmiidity.

¹³Co je mujcu' ijxy co ti yajcötijnaxy ya naaxhuiñgíxy, chi ooy pahuidijttacy je töxyjäy huidibi anajty ti yajpi'c'aty pi'cyëdyjc.

¹⁴Chi je töxyjäy metz me'tyqueec mijpi yajmoy, jigix cöguëgipy je ama'y tza'ñ, ñicxip agueegüccip mijtigüduum ma je ama'y tza'ñ ca' ñijädiiby. Jim mijtigüduum yajmoy ycaayin y'uucin tugiig jimijt ja cup. ¹⁵Chi je ama'y tza'ñ ooy nii yajpidzimy ma y'ahuac, jigix y'ahuimbidity mij nii huidi je töxyjäy pagujip mij nijoty. ¹⁶E yi naax ooy je töxyjäy pubejty, chi je naax y'ahuäcxy, e uuctiitztay je nii huidibi anajty je ama'y tza'ñ ti yajpidzimy ma y'ahuac. ¹⁷Miid jada ycixpi je ama'y tza'ñ ooy

y'ahua'ndacy miid je töxyjäy, chi ñicxy tziptumbi miid je töxyjäy y'ap y'oc huidibi jacjimip, je' ajcxy huidibi cuydumb Dios y'ane'min ycötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

Je metzpi ca'oy'iyujc

13 E jim ndinay'ihuiiyich ma püjot mejypäbi. Chi nhuin'ijxyich co tüg iyujc janch oy chigiinyi ypidzimy mejyoty ymiid anajty huixtuc ycohuajc, e majc ymu'n. E ma ymu'n miidity majc corona. E ma ycohuajc miidity anajty cojaay yxii huidibi yajjotma'tp Dios. ²Jadayaabi ca'oy'iyujc huidibi nhuin'ijxich, jadu'n anajty yquëxigy nej tüg cuuxyubijy. E ytecy jadu'n anajty yquëxigy nej osi ytecy, e y'ahuac jadu'n anajty yquëxigy nej jamgaa y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³E n'ijxyich tüg ycohuajc ma je ca'oy'iyujc co mij chaachijty, nej jihuüy je' yaj'ögiib. Chi je chaachi'au oy choogy, e tüg'óciy naaxhuiñyäjy ooy janch jihuüyigixy huinmaaygixy miid jada ycixpi co ti choocy. Chi je mayjäy ajcxy panicxy je ca'oy'iyujc. ⁴Je mayjäy ajcxy ooy huindzigiigixy je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigiigixy je ca'oy'iyujc, chachminaangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip miid yi'? Ca' pin.

⁵Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi miid'adipy ane'min cötujcin huixchiguipx metz po'. ⁶E jadu'n je' tuuñ. Nigapxy ni'oñiy ooy Dios. Nigapxi Dios yxii oy ca'oy, etz nigapxi ni'oñiy Dios ytijc. Nañ jadu'n nigapxy ni'oñiy huidibi ajcxy jibby tzinaayb tzajpjoty. ⁷Chi mic'ajt ymooyi, jigix chiptuunip miid je huidijaty mibijcp Dios, huidijaty miid ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñyäjy huen huidibi razaity huen huidibi cajpity, huidibi capxcixp huen huidibi ayucity. ⁸Tüg'óciy mayñaaxhuiñyäjy ajcxy huidijaty janch ni ycamiiñ yxii jaybety ma je jugy'ajt libro huidibi je Dios y'ung, je Cordero, ymiid. Dios yhuinma'ñypidacy jayijp ca'ni naaxhuiñybi anajty chondägy co y'ung y'öga'ñ miid jäy ajcxy ycixpi, jaydëbi cijxjaayi ajcxy yxii ma yi jugy'ajt libro.

⁹Pinjaty tädz'ac miid, pinjaty mido'mbigamb jada ayuc, huen mido'mbijccixy. ¹⁰Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady ycixp yi' ajcxy huidijaty mibijcp Dios, huen yajtungixy miid ymigügtijc mecxtujcin etz mibijcin.

¹¹Huin'it nhuin'ijxyich jadüg ca'oy'iyujc chooñ naaxjoty, e ymiid anajty metz ymu'n, tim jadu'n nej

pi'ccöbixymang ymu'n. E je' jadu'n anajty ycapxy nej je ama'y tza'n ycapxy. ¹²Je mimetzpi ca'oy'iyujc ymiid ane'min huidibi je jayijpi ca'oy'iyujc ti ymöy. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñyäj huen ojadajtcixy huindzigiigixy je jayijp'atypi ca'oy'iyujc huidibi anajty je chaach'au ti chögy. ¹³Nañ jadu'n ooy anajty tijaty mijhuinma'n tuñ, ixti jijn yajcödigiiyb tzajpcixy, yajcäy naaxcixy ma jäy ajcxy yhuinduu. ¹⁴E miid je mijhuinma'n huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'iiñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajniogjtútcixipy je ca'oy'iyujc huidibi anajty tzachijip miid espada, e ca' y'ögy, jadu'n anajty jactzinäy. ¹⁵Je mimetzpi ca'oy'iyujc yajmic'ajtmoy co yajjugy'adip je tzaadzech tiibi anajty yajniogjtuttcixy, jigix je' ycapxipy etz nañ jadu'n jigix je' ane'min pidägipy co yaj'öctähuipy pinjaty ca' y'ojadadyi. ¹⁶Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeñydijc, ayobitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymiid je ca'oy'iyujc tiy'ajt y'iixpejt, o yxii, o je' yxii ñinúmero. ¹⁸Jadayaabi ayuc chojpcy ixipecin, pinjaty huinjihuuiyb jëbi mihuinma'nybaady ti número je

ca'oy'iyujc miid. Je' je' je número huidibi tüg jäy miidity. Je jäy ñinúmero hue' je' tudujc migo'px jatugipx tudujc.

Je nimigo'px jahuixchiguipx milbi yëydijc ajcxy y'iy

14 Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögop huidi yxii Sión. Ymiid anajty migo'px jahuixchiguipx madaax mil jäy huidibi anajty ajcxy miid cojay ma yhuimboc je Dios y'ung yxii, etz yi' yTeedy yxii, je Dios Teedy. ²Nhuinmidooyich tüg ayuc choon tzajpjoty, jadu'n nmidooyich nej mijni y'a'ich, nej enee yjidity. Hue' je' anajty nmidooyich nej mayjäy y'arpa yajcoogixy. ³Ooy anajty ajcxy iigixy tüg iy jemybi ma je mij'ane'mdac yhuinduu, ma je midaaxpi iyujc jugy'ajtmidpi yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jëyi ajcxy je huixchiguipx midaax milbi jëbi ixipecixy je iy, je huidibi ajcxy Dios ti yhuin'ixyii etz ti yajnidzögy ya naaxhuiñ. ⁴Jada je' ajcxy huidibi ca' ajcxy migapxtigooygixy töxyjäydijc, huädz tudägy ajcxy yjot yhuinma'n miidity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'ámy ñicxy. Yi' ajcxy je jayijp'atypi jäy ya naaxhuiñ huidibi Dios ti jyuybidzimy ma anajty ijtcixy codoogiy miid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵Ni ti anii

ti ycayajpaady ma je' ajcxy. Com ca' ajcxy tibocy miidity, ca' ti xihuín ajcxy miidity ma Dios y'ane'mdac.

**Je nidugiigpi ángeles
ajcxy y'ayuc ytiy'ajt**

⁶Chi nhuin'ijxyich jadüg ángel yqueec-huidity cuptzajp, e ymiid anajty Dios ytiy'ajt jemybi oybi huidibi ijtp huinixii. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷E je ángel ymina'n anajty janch mic:

—Tzigiiygix Dios, huin'iigix huinyaaxcix cömaygix Dios. Ti paady je xii je hori mina Dios tiyduna'n yajtigoya'n yi' ajcxy huidibi jibic tumb. Ojadajtcix je huidibi yaj'oyiyy je tzajp etz je naax, je meyy etz majaty nii ymuxy.

⁸Co je midügpi ángel ycapxtaay, chi je mimetzpi ángel ymina'n:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'n dydigoydäy je naaxhuiñy jäy miid yjibic-huinma'n, paady yi Babilonia jäy ayo'n miidity cham, com je Dios ti ymijotmättäyii ajcxy. Jadu'n Babilonia nipaady nej tüg töxyjäy huidibi huin'imb yëydijctijc miid anii etz jocnii.

⁹⁻¹⁰Co je mimetzpi ángel ycapxtay, chi je midugiigpi ángel ymina'n janch mic:

—Pen pinjaty huindzigiyyb yajmij'ajtíp je ca'oy'iyujc etz je ñigojtuutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci',

hue' Dios tzaachytuniib yi jadu'mbi jäy ajcxy mictägy, ypaadip ajcxy Dios chip y'ejcin. Tim jadu'n nipaady nej jihuüy Dios yaj'tügyii ajcxy je vino nii huidibi yi' ti ni'ixiyy. Dios ti ni'ixiyy je it ma ajcxy ayo'n pada'n, tim jadu'n nipaady nej je tasi ma Dios yvinonii ijtp. Chi je' ajcxy ayo'n paadipy ma ytoy je mijjiin miid azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹Je jijnjoc huidibi anajty pidzimb ma anajty je mayjäy ayo'n paatcixy, pidzimip je' huinixii huinitempo. E ni poccxin ycaca'ty xim tzuum miid je pinjaty anajty huindzigiyyb pa'tjihuiyyb je ca'oy'iyujc etz miid y'ahuinax, o pen ycöbijccipy anajty je ca'oy'iyujc yxii ycojayity ma yhuimboc o ma yci'. ¹²Com Dios chaachytunamyb je jäy ajcxy huidibi ijtp miid je ca'oy'iyujc, paady ycixp copicy co yi jäy ajcxy huidibi ijtp miid Dios huen cuydungixy yajxon Dios y'ane'min ycötujcin etz huen mibijccixy mijpidaaccixy tudägy Jesús, etz nañ jadu'n yajtungixy mecxtujcin ma ajcxy chinaayin.

¹³Nmidoohuich tüg ayuc tzajpjoty choon xyñimäyich anajty:

—Cojay jada ayuc: “Jadachambi etz jacnicxpi xii tiempo, jotcujc ajcxy huidijaty öccixp co mibijccixy je Huindzin Jesús.” Je Espíritu Santo ymina'n co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhuñhuip je' ajcxy tzajpjoty tzinaaybi jadu'n nej je mibijcpi ajcxy anajty oybi ti tungixy.

**Co Jesús anajty miñ tiyduñ
tzaachytuñ jibicjäydijc**

¹⁴Chi jada' nhuin'ijxyich tög joc janch poob. E ma je joc nïcx iñäy tög yquëxïgy nej je jäy huidibi tzoon tzajpjoty (je Cristo). Je' ymiid anajty ma ycohuajc tög corona ac oori, e ma yci' miidity tög hoz janch jïjpi. ¹⁵E ypidzimy ma je Dios chinaydac jadüg ángel, je' tzachmiyäxy anajty janch mic je huidibi anajty iñaayb jocnögíxy, ymina'n:

—Pidäg yi mhoz, e yajpidög yi cosecha, com ti paady je xii je hori etz je cosecha ti chamni jiiby naaxhuiñ.

¹⁶Huin'it je' pidacy je' yhoz ya naaxhuiñ, je huidibi anajty iñaayb jocnögíxy, chi ya naaxhuiñ yajpidögy je ycosecha.

¹⁷Nañ tim jadu'n huin'it jadüg ángel ypidzimy ma je Dios chinaydac jiiby tzajpjoty. Nañ jadu'n je' anajty miidity yhoz janch jïjp. ¹⁸Chi jadüg ángel ypidzimy ma je Dios ojadajttac huidibi anajty cötujc miid ma je jïin. Chi yaaxi janch mic je huidibi anajty je' yhoz janch jïjpi miid, chi nimay:

—Pidäg yi mhoz janch jïjpi ma yi muuxycha'm cosecha huidibi yajpatp jiiby naaxhuiñ, com ti ooy chamni.

¹⁹Chi je ángel yajnaxty je' yhoz naaxhuiñ, chi yajpidögy je camuuxycha'm cosecha, chi tög'ftiy yajnögidacy ma huaad yajhuinmïicxy. Hue' je' yhuimbizimy co je' je' je mij ayo'n je mijtzaachypi huidibi Dios yquexamyb miid jäy ajcxy ypocy

ycixpi. ²⁰Je camuuxycha'm hue' je' oy yajhuinmïicxy Jerusalén cajppa'. Ma anajty ti y'ocnögidacpi ypidzimy ooy ni'py janch com, ycoody mabaad je cohuay ajcxy miidity yfreno, e ymijhuin'ajtin hue' anajty miidity tugiig migo'px kilómetro.

**Yi ángeles ajcxy miid je
huixtujcnajxpi ayo'n**

15 Huin'it nhuin'ijxyich jadüg tiy'ajt ixxpejt janch mijpi tzajpjoty, e janch oy huinmaayñi. Huixtujc ángeles anajty miidity c'lam je huixtujcpi tzaachypi ayo'n huidi cogixiynip, e miid jadu'n ycixa'n ytigoya'n Dios chip y'ejcin.

²E nhuin'ijxyich jadu'n nej tög mejy ac vidrio, e je vidrio mihuididii jïin. E jim anajty je jäy ajcxy huidijaty madac co ca' huindzigïy anajty je ca'oy'iyucj etz je' y'ahuinax, je huidijaty ca' ajcxy cöbijci je ca'oy'iyucj yxii ñinúmero. E jim anajty ajcxy ytinaaygixy nögixy ma je mejy ac vidrio huidibi janch adiicxp ajajp anajty, ymiid ajcxy je arpas huidibi ajcxy Dios mooyi. ³Ooy anajty iigixy je Moisés y'iy, je Dios ytumbi etz nañ jadu'n anajty iigixy je Dios y'ung, je Cordero, y'iy huidibi minamb:

Mij ooy, etz janch mijhuinma'n huidibi miich ti mduñ.

Huindzin, miich Dios huidibi jac mic'ajt miidip ca'ydí jac pin. Janch tudägy miich mnii'aa mdu'aa. Miich rey'ajtp huindu'myñaaxhuiñ huinixii huinitiempo.

⁴¿Pin miich xyc'a'octzigïhuamb, Huindzin? ¿Pin miich xyc'a'occömayaanip

mxii? Tug'óciy
naaxhuiñyäjy xyajmij'adipy
xyhuindzigihuipy, com miich
naydügpajc je huätzpi Dios,
com miich nyaj'ijxp mgötujcin
co ytudägyt.

⁵Co jadu'n yjajti, chi n'ijxyich co
y'ahuaach je Dios y'it jiiby ma Dios
ytijc huidibi yajpatp tzajpjoty, ma
y'ity je tzaa ma yjaybetyity Dios
ycötujcin. ⁶E ma je Dios yajhuindzigy
yajpa'tjihuüy, jiiby ypidziimy huixtujc
ángeles. Ymiid anajty ajcxy yc'am
huixtujc ayo'n tzaachypi. Hue' anajty
ajcxy yxoxity miid huit janch oybi
janch huätzpi, e janch adiicxp ajajp
anajty. Ymiid anajty ajcxy oorihuiñ
mabaad ycaachyjip. ⁷Nidüg je
midaaxpi iyujc jugy'ajtmiidpi moy
je huixtujcpi y'ángeles huixtujc
tasi ac tim oori, janch ujtz je tasi
miid je Dios chip y'ejcin. ⁸E je it
ma Dios yajhuindzigy yajpa'tjihuüy
yajpa'tjihuüy ujtztay je' miid je jijnjoc
huidibi jadu'n ñipatpy nej je Dios
y'oy'ajtin etz Dios ymic'ajtin. E ni
pin anajty huaad ca' jiiby ytigy ma
je Dios ytijc jiiby tzajpjoty, ixti cooni
je' ycijxtähuipy je huixtujcpi ayo'n,
je tzaachypi huidibi je huixtujcpi
ángeles ajcxy ymiid.

Je tasi huidibi ujtz miid ayo'n tzaachypi

16 Chi nmidooyich tüg ayuc
chooñ ma Dios ytijc jiiby
tzajpjoty, nimay anajty janch mic je
Dios y'ángeles nihuixtujcpi:

—Nícx ajcxy yajyojctuticx jiiby
naaxhuiñ yi huixtujcpi tasi huidibi
ujtzity miid Dios chip y'ejcin.

²Chi ñicxy je midügpi y'ángel, chi
je' ytasi yajtemduty jiiby naaxhuiñ

ujtz miid may'ayo'n. E tüg'óciy je
mayjäy huidibi anajty ajcxy miid
ma yhuimboc je ca'oy'iyujc ytiy'ajt,
pinjaty anajty je ñigojtuutin
huindzigiiyip pa'tjihuüiyip, chi je'
ajcxy ypaati ñibidzim tüg ñibüd
janch jibicpi, e huidibi janch pijcp.

³Je mimetzpi y'ángel yajyojctuty
je' ytasi huidi anajty ujtz miid
ayo'n mejyhuingxy. Chi je mejy
y'ahuimbijty ni'py, jadu'n nej jihuüy
öcpi ni'py. E huidijaty iyujc jiiby
tzinaayb mejyjoty, cijx je' y'öctäy.

⁴Je midugiigpi y'ángel yajyojctuty
je' ytasi huidi anajty ujtz miid
may'ayo'n maajaty je mijni, etz
maajaty nii ymuxy, nañ jadu'n
ac ni'py je' y'ahuimbijttay. ⁵Chi
nmidooyich co je ángel ymina'n
huidibi ane'mb je nii:

—Huindzin Dios, tudägy mduñ
co ti mdiyduñ je naaxhuiñyäjy
ajcxy miid ypocy ycixpi, e jadu'n
ti mguexy mij ayo'n ya naaxhuiñ,
Huindzin Dios, janchypi huätzpi
miich, huidibi ijtñaayb etz ti
m'ijtnäy. ⁶Com je naaxhuiñyäjy
ajcxy tundigooy co ajcxy teemi
yojci je mibijcpidijc ni'py, je
huidibi mhuin'ijx, je huidibi ajcxy
miich m'ayuc najtzcaxiiyb anajty.
Paady ycixp miich je nii huidibi
yi naaxhuiñyäjy y'uuccixyp, ti
myaj'ahuimbity ni'py, com jadu'n
ajcxy mihuuaadity je tzaachypi miid
ajcxy ypocy ycixpi.

⁷Nmidooyich co pinjaty ma je it
ma yajhuindzigy Dios, ymina'n:

—Janch jadu'n, Huindzin Dios,
huidibi tüg'óciy mic'ajt miid, miid
mdiy'ajt etz miid mdudägy'ajtin,
ti mdiyduñ je naaxhuiñyäjy ajcxy
miid ypocy ycixpi.

⁸Je mimadaaxpi Dios y'ánel yajyojctuty ma je xii je' ytasi huidi anajty ujtz miid Dios chip y'ejcin. Chi je xii yajmoy ymic'ajt co jäy nögiib miid je' yjiin. ⁹E tüg'óciy jäy ajcxy yxiidzaydaayi janch mic. E ni ca' ajcxy yhuinma'n yajtigajch, ni ca'ojadajtcixy ni ca' cómaygixy Dios. Nígi ajcxy ooy jibic Dios nigapxy ni'ojiiy, je Dios huidibi ane'mdaayb tüg'óciy ayo'n miid ymic'ajt.

¹⁰Je mimigooxpi y'ánel yajtemduty je ytasi, huidi anajty ujtz miid Dios chip y'ejcin, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'min, e huin'it oy ycoodzygidactäy. Yi jäy ajcxy ooy ytoodz oc'adzützmújccixni miid je ayo'n tiibi anajty ytuñiy yjadyii. ¹¹Per ni jadu'n ajcxy ca'ixmajch je jibicpi huidibi anajty ajcxy ytumyb. Nígi ajcxy ooy oyñinej ycapxcixy etz ni'ojiiygixy Dios tzajpjotypi miid je jübi pa'mii etz je nibüdz ycixpi.

¹²Je midudujcpi y'ánel yajtemduty je ytasi huidi anajty ujtz miid Dios chip y'ejcin ma je Eufates mijni. Chi je mijni ytiich jigix jébi ajcxy je reydiic ñaxy huidibi ajcxy tzoomb xiibidzimy'amy.

¹³Chi nhuin'ijxyich co ypidzimy ma je ama'y tza'n y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugiig ca'oybi. E je tugiigpi ca'oybi jadu'n anajty yquëxigy nej tugiig tuc. ¹⁴E je tugiigpi tuc hue' ajcxy ca'oybi ymiid, e tungixy anajty mijhuinma'n miid je mujcu' ymic'ajt. E oy ajcxy

huoomucy huidijaty anajty rey'ajtp huindu'my naaxhuiñ, jigix je' ajcxy chiptúngixipy miid je mijpi Dios huidibi tüg'óciy mic'ajt miid, co anajty je xii je tiempo yhuaad'ajtni huidibi Dios ti yajniğöduğy.

¹⁵Jadu'n Dios ymina'n:

—Cuenditungix iich n'ayuc.

Ameech nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcujc pinjaty ni'ixi xy'ahuijxpich, je huidibi ypocy ti ymecxyii, e tudägy'ajtni ti paady ma iich jigix ca' jadu'n paadip nej tüg jäy huidibi yhuit ti meechyii, e jadu'n je' yhui'my ni'huädz, e tzo'ydu'n jihuü co jäy yhuindixyii. ¹⁶Chi je tugiigpi ca'oybi huoomujctay ajcxy je reydiic ma tüg it huidibi yxii Hebreo'amy Armegeđon.

¹⁷Je mihiuxtujcpi angel yajyojctuty je' ytasi jim pojgoty, e ma je it ma ajcxy huindzigy Dios etz ma je' y'ane'mdac tzajpjoty, jiiby tüg ayuc choon janch micpi ymina'n anajty:

—Ti ytuñiy yjadyii.

¹⁸Huin'it ooy yajti huidzuc, ne'min micpi etz jidiitin, ooy naax yücxy miid tüg ujx janch micpi, niminaabi jadu'n ycajadyii maabi jäy chinay'íjtigixy naaxhuiñ. ¹⁹Chi je mij ciudad, je Jerusalén, oy yhuäcxy tugiig picy, nañ jadu'n je may ciudad huidibi huindu'myñaaxhuiñ, cijx ymijähuiydäy. Chi Dios jäymejtzcoty je Babilonia cajp nej je jäy ajcxy jim ytundigooygixy, e chi quejxy may ayo'n jim miid chip y'ejcin ycixpi. ²⁰Tüg'óciy je naax mejy'agujcpi ytigoyday. Etz

tüg'óciy tungop naaxhuiñyíxy cijx je' ytigoydäy. ²¹Nañ jadu'n ooy ycäy chooñ tzajpjoty eneediitz mijjatypi majaty jäy ajcxy, janch jempxy anajty je eneediitz, tügjatypi huixchiguüpxy kilo. Chi jäy ajcxy ooy oyñinej nigapxy ni'ojiy je Dios miid je eneediitz ycixpi, com ooy je' mij chachajti je ayo'n je castigi.

**Je töxyjäy jibictzinaaybi
chaachypi ycastigi**

17 Nidüg je huixtucpi ángeles huidibi anajty ajcxy miid je huixtucpi ytasi ymiñ. Chi ajcxy ymiydacy miid iich, xyñimaaygixich:

—Min yam, miñ nyajni'ixiy je tzaachypi huidibi ypadamyb je töxyjäy pocytumbi, huidibi iñayb mejyhuingíxy. ²Je reydiyc ya naaxhuiñ ti ooy ytundigooygixy miid jada töxyjäy, e je naaxhuiñyäjy ajcxy ti ooy huinma'ñyidigooygixy miid jada töxyjäy ypocytunii huinma'ñ, jadu'n nej jihuüy ajcxy ooy ti ymúucigixy.

³E Dios yjihui'ñ ymic'ajt xyajcumäyich e cumäyjoty xyajnicxyich je ángel migtigídum. E jim n'ijxyich tüg töxyjäy yaj'iñäy tüg ca'oy'iyujc huidibi ycolor tzaptz, e janch niducy miid pinjaty yxii cojaayip huidibi yajjotma'tp Dios, e ymiid anajty huixtuc ycohuajc etz majc ymu'n. ⁴Je töxyjäy hue' anajty yxojx miidity miid huit janch oyjatypi, ycolor ucy etz tzaptz, ooy anajty yaj'oyguëxigy miid oori, miid pi'ctzaa janch oybi etz perla. Ymiid anajty ma yci' tüg tasi ac tim oori janch ujtz je' anajty miid jibic-huinma'ñ huidibi

ca' y'oyjäygidaacnity, huidibi pocytunii huinma'ñ miid. ⁵E ymiid anajty cojaay tüg xii ma yhuimboc huidibi ca' pin huinjihuüy. Je letra jadu'n ymina'ñ: “Je mijpi Babilonia, huidibi nigop'ajtip pocytunii huinma'ñ etz tüg'óciy tijaty ca' y'oyjäygidaacnity ya naaxhuiñ.”

⁶Mic'amy iich oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huidibi ajcxy mibijcp Dios etz huidibi ajcxy Jesús yjäy'ajtip, e jadu'n nipaady nej jihuüy je töxyjäy ti ooy ymügyii miid je mibijcpidiyc ñi'py. Co jadu'n nhuin'ijxyich, chi ooy ngijxy ngüejtyich njihuüy nhuinmaayich.

⁷Chi je ángel xyñimaayich:

—¿Nej co mgixy mgüety?
Iich miich nyajnimähuipy nej yhuimbizimiy huidibi ca' pin huinjihuüy ma yi töxyjäy etz ma yi ca'oy'iyujc huidibi yaj'iñayb, huidibi ycohuajc huixtuc miid etz majc ymu'n. ⁸Yi ca'oy'iyujc huidibi ti m'ixy, je' yi' tiibi chinäy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy ytigoy tücc'i'yi. E je jäy ajcxy huidijaty tzinaayb naaxhuiñ, e ca'p yxii y'ity cojaay ma je jugy'ajt libro huidibi oyiiy ca'ni anajty naaxhuiñybi chondägy. Ooy je' ajcxy huinmáaygixipy jihuiyigixipy co ijxcixipy je ca'oy'iyujc huidibi jecyip ti y'octzinaaybi, e cham ca' je' ma, e chi jada' jadüg'oc yhuimbida'ñ.

⁹Ya ii tigati pin jëbi huinjihuüy je huixtucpi cohuajc, je' je' je huixtucpi copjot ma je cajp y'ity. E je cajp jadu'n je' nipaady nej jada töxyjäy pocytumbi. ¹⁰Je huixtucpi

cop jadu'n ajcxy nej huixtucpi rey. Ma je huixtucpi rey migoox je' ajcxy tiibi ymic'ajt ytigooygixy. Nidüg je' cham y'ane'my. Je jadügpi ca'ni je' ymiin. E co je' ymiinipy je huidibi cogixiib, ca'p je' mijcjee yhuäcxibipy. ¹¹Je ca'oy'iyujc huidibi jecyip tzinay, e cham ca' ma, je' je' je miductucpi rey, oy je' yjajëjty nidüg ma je nihuixtucpi rey. Huin'it je' ñicxnipy ayoobi jottigooybi tücc'i'y ayoodactuuby.

¹²Je majcpi mu'n tiibi m'ixy, je' je' je majcpi rey huidibi ca'ni ajcxy ytiigiygixy ane'mbi. E cïdigihuiib ajcxy ycötujcin co yrey'äjtciixipy tüg hora quipxyi miid je ca'oy'iyujc. ¹³Jada majcpi rey ajcxy tú'ciy ajcxy y'ljtcixy, tú'ciy ajcxy yhuinma'ñ, e yegipy ajcxy y'ane'min ycötujcin ma je ca'oy'iyujc. ¹⁴Tziptuunip ajcxy miid je Dios y'ung, je Cordero. E je Cordero ymimadactähuipy je' je majcpi rey ajcxy. Com je' je' tügpajc Huindzinip ma pin janaydjip huindzin. Je' je' tügpajc reyip jac mic'ajt miidpi ma je reydiyc ajcxy. E pinjaty Cristo miid y'ity, Dios je' ti huin'ixy, e tudägy je' panicxy Dios y'ung.

¹⁵Nañ jadu'n je ángel xyñimaayich:

—Yi mejy tiibi m'ixy ma je töxyjäy pocytumbi ñäy, hue' je' jadu'n nipaady nej maygajp, nej mayñación ma mayjäy chinaygixy huidibi capxcixp canaagnax ayuc. ¹⁶Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je töxyjäy pocytumbi. Chi ajcxy ix'ijxnip je töxyjäy pocytumbi, yajhui'mipy ajcxy niñuadz. Chi ajcxy je töxyjäy

pocytumbi ñin'icx tzu'tzipy, e nöccixipy miid jün. ¹⁷Dios ti pidägy ma ajcxy y'aa yjot huen tungixy nej Dios tzocy, miid co anajty ti pidaaccixy tú'ciy yhuinma'ñ. E cötujc möhuaangixy ane'min möhuaangixy co yrey'adipy je ca'oy'iyujc, ixti cooni yajcuydundähuipy je ayuc huidibi Dios anajty ti capxy. ¹⁸Je töxyjäy tiibi mhuin'ixy, je' je' je mij cajp huidibi ane'mdaayb je reydiyc ajcxy huindu'myñaaxhuiñ.

Babilonia cajp oy yhuindigooy

18 Co jada jadu'n yjajti, chi nhuin'ijxyich jadüg ángel ycidägy naaxhuiñgixy, choon tzajpjoty miid ymij'ane'min ymijcötujcin, e ooy je naax yaj'aniñ miid je ytiicxin yjajin. ²Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic'ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygidaacnity.

³Com ti je mayjäy huidibi tzinaayb ma tüg'óciy nación yhuinma'ñyidigooygixy miid je Babilonia yjibic-huinma'ñ pocytunii huinma'ñ. Ti je reydiyc huidibi ane'mb ya naaxhuiñ miid ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy miid je Babilonia pocytunii ñegocio. Je Babilonia

jadu'n yi' nej tüg töxyjäy jibic-huinma'n miidpi.

⁴Chi nmidooyich jadüg ayuc choon' tzapjoty, e ymina'n anajty:

—Pidzimgix ma yijiibi cajp com iich miich ajcxy një'ajtpy, jigix miich ajcxy ca' m'aminmugipy ma yi' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵Yi jadu'mbi cajpjäy ypocy ti oy mayiinyi e Dios yi' ajcxy tzachytuniib miid ajcxy ypocy ycixpi. Dios yjäymejchp yi' yjibic-huinma'n ajcxy huidibi ti tungixy. ⁶Dios ymoyhuimbidity je tzaachypi yi Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ni ca'ydi jadu'n nej yi' ti yecy. ⁷Mo' yi Babilonia cajp yi tzaachpyi ayo'n, tim jadu'n nej yi' ti ñaymöyii ma yi chinaayin etz ñayjihuiyi amij agix. Yi' ymina'n jotjoty huinma'nyjoty: “Iich mij'ane'mbi iich. Ca' nyajpaadyich nej tüg co'ögytöxyjäy miidity tajin mayin. Ni nga'ixipyich jiiyin yaaxin.” ⁸Miid je' ycixpi tügxiiyi ymiinipy je mij'ayo'n o'cin, tajin mayin, jiiyin yaaxin etz yuuba'm ma je Babilonia cajp. Chi ninögihiupy je Babilonia cajp miid jiiin. Com yi Huindzin Dios ooy yi' ymijity, e yi' ti yajpocycäy yi Babilonia cajp, huidibi nipatp nej tüg töxyjäy pocytumbi.

⁹Je reydiyc naaxhuiñ huidibi jibic-huinma'n pocytunii huinma'n tungixp quipxyi miid je Babilonia jäy, chi ajcxy ytájcixipy ymáygixipy yjiygixipy yáaxcixipy co anajty

ijxcixyp je Babilonia cajp jiiinjoty co anajty ytooybicy. ¹⁰Jiguem ajcxy yjacmij'ijxcixipy miid co anajty chigiigixy co páatcixipy ayo'n quipxy miid Babilonia, e ymináangixipy:

—iAy, miich Babilonia mij cajp, huidibi ooy mgapxpaadyity, ooy mmijity, ooy mmic'ajt miidity! Per janch tim tüg jaxigy ti xynimiin je' ayo'n huidibi Dios ti quexy miid mbocy ycixpi.

¹¹Je ajuybidijc adoocpidijc huidibi ajcxy naaxhuiñ jiiygixipy yáaxcixipy ajcxy miid je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³Je ajuybidijc adoocpidijc ajcxy ymiid oori, plata, tzaa oyjaty, perla oyjaty, lino huit oyjaty, sedi huit oyjaty, rey yhuit, huit color tzaptzpi, nañ jadu'n ymiid ajcxy canaagnaxpi quipy huidibi oyjaty xuucp, pajc vaso, quipy vaso oyjaty, cobre vaso, pujx vaso, marmol vaso. Ymiid ajcxy canela, etz tijaty ooy oy xuucin miidity, poom, mirra, perfume, vino aceite, trigo tiim, iyujc animal huidibi tziy yajyöyb, cöbixy, cohuay, carreti, tumbi huidibi codoogiyip, etz jacjadyi jäy juugyp. ¹⁴Je ajuybidijc adoocpidijc ajcxy ñimähuipy je Babilonia jäy ajcxy:

—iCa' ajcxy m'ocmiidiñ je tiim tza'm huidibi ajcxy mjot yjatzojcyp, ca' ma anajty y'ocyajpatni. Ti tigoydäy miich ajcxy mjogy'ajt, je mgomeeñ'ajt, etz m'ijxin huidibi anajty miich ajcxy mmiiid, ca' ma ocyajpatnip jadüg'oc!

¹⁵Je huidijaty anajty huit ixtaayb meen' ixtaayb, e ti ycomeeñygojcixy

ma yijimbi cajpín, jiguem ajcxy yhui'mdāhuipy miid tzig'iñ jihui'ñ, co nañ jadu'n je tzaachypi castigi padaangixy. Yäxip ajcxy etz nidájicixipy nimáaygixipy je Babilonia cajp. ¹⁶Chi ajcxy ymínaanipy:

—¡Ay! ¡Miich mij cajp huidibi ayo'n patp! Jadu'n miich anajty nej tüg töxyjäy huidibi xoxyip miid huit oyjatypi, huidi ycolor ucy etz tzaptz, yaj'oyguëxigy miid oori, miid pi'ctzaa oyjatypi, miid perla. ¹⁷¡Janch tim tüg jaxigy, janch tim tüg hori, ti ycixy miich mmijjugy'ajtin mmijcomeeñ'ájtín!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je meyy, ti je' ajcxy yhui'mdaaygixy jiguëgy. ¹⁸Co ajcxy ijxy nej anajty ytoy yjocy je mij ciudad, chi ajcxy ymínañ:

—¿Huidibi cajp jada' ji jadu'nip nej jada anajty jadayaabi mij cajp?

¹⁹Chi ajcxy ooy naax ñayyajcöhuoogiíy miid jotmay, cham ooy yaaxcixy, ytajcixy ymaygixy, e mic chachmínaangixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymiid barco ma meyy, ti ycomeeñygojcixy anajty miid je'! ¡Janch tim tüg mij jaxigyí, tim tüg hori, ti yhuindigoydäy miich mmijjugy'ajtin mgomeeñ'ajtin!

²⁰Jotcugiíygix miid je Babilonia cajp ycixpi, miich tzajpjoty tzinaayb ajcxy, etz miich ajcxy huidibi Dios xyhuin'ijx co jëbi m'apóstol'ajtcixy, etz nañ jadu'n miich ajcxy huidibi najtzcapxiíy Dios y'ayuc ytiy'ajt, etz nañ jadu'n

pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymiiddundigoy.

²¹Huin'it tüg ángel janch mic'ajtmíidpi conigy tüg tzaa, jadu'n nej tüg molino paandzaa mijpi, chi je' cogädziíy mejyjoty, e ymínañ:

—Nej jada tzaa ti ytigooyin, nañ tim jadu'n je mijpi oybi Babilonia cajp ytigoydāhuipy. E janch ni mína pin cajac'ixipy. ²²E ni camína ajcxy mgajac'midohuipy jim Babilonia co pin arpi coob etz flauta yajxuuxp trompeti yajxuuxp mijnií mijtu'. E ca' jacyajpaadip pinjaty ti dung ii jajtp, ti oficio jajtp, ni mgamidohuipy je molino paandzaa ñe'mín. ²³Ni mína ti ycatiicxipy jadüg'oc ma je Babilonia cajp. Ni mína ycayajmidohuipy jadüg'oc je xii je xondaacin huidibi jajtip co jäy ypicy. Oy je Babilonia ajuuybi y'adoocpi ajcxy anajty ooy yjamicjäyity ya naaxhuiñ, e ti ajcxy huin'íiñ mayñaaxhuiñyjäy miid ajcxy brujerías.

²⁴Jim ma je Babilonia cajp jim yajpaady je' ajcxy ñi'py je tiibi ajcxy Dios y'ayuc najtzcapxiíy, je huidibi ajcxy huin'ixyíy ma Dios etz tüg'óciy mibijcpidijc tiibi yaj'ögypaatcixy naaxhuiñygyíx.

19 Co jadu'n yjajti, chi nmidooyich may'ayuc micpi co mayjäy ajcxy ooy ycapxcixy ymiydaaccixy tzajpjoty, ymínañ ajcxy:

¡Aleluya! Hich ajt nDios yi' tügpajc ti xyajnidzoocím ajt n'alma. Yi' je' tügpajc mij'oy'ajt miid.

² Com janch etz tudägy Dios
y'ane'min ycötujcin. Ti je'
möy ycastigo je Babilonia cajp
huidibi ti yajhuinma'ñydgoy
je naaxhuiñyäjy miid je
ycatudägy'ajtin ycixpi. Yi' je'
ti yaj'adigach ma je Babilonia
cajp je Dios ytumbi, huidibi
yaj'ögy ajcxy, pat jim.

³ Chi ajcxy jadüg'oc yminanip:
—iAleluya! Je jijnoc huidibi
jim Babilonia co ytoy je cajp,
pa'ttigihuip tzajpcíxy huinixii
huinítiempo, ca' yjiin ypidzip ni
mina.

⁴ E je iipx madaaxpi mijjäy etz
je madaaxpi iyujc, huidibi jugy'ajt
miid ñaygojxtinaygidaaci naaxcíxy,
chi ajcxy ooy Dios ojadajty huidibi
anajty ane'mb ma je mij'ane'mdac,
e yminaangixy:

—iJadu'n jada! iAleluya!

⁵ Huin'it yajmidooy jiiby ma je
Dios y'ñaydac ycötujctac tüg ayuc
ymina'ñ:

Huindzigiiygix iibatcix
capxpatcix iich ajt nDios
nidüg'óciy pinjaty tumb
miid yi', pinjaty yi' tzigiiyb,
huen mutztijcity huen
ymij'anäctijcity.

**Je jotcuje'ajtin huidibi nbadaanim
co anajty Cristo yjäy nimiñ**

⁶ Nmidoohuich nañ jadu'n nej
jihuüy ooy mayjäy ycapxy ymiydägy,
nej canaag mijñii y'a'lich, nej enee
micpi yjidity, yminaangixy:

iAleluya! Ti y'ane'mdigiy jiiby
naaxhuiñ je Huindzin Dios
huidibi tügpajc mijip.

⁷ Agujc'ajtim jotcuje'ajtim,
tzoc cōmaayim Dios, tzoc

mooyim mij'ajt. Com ti
paady je xii je tiempo mina
Dios y'ung naybadáanigixp
tümugáanigixp miid yi' yjäy,
tim jadu'n nej jihuüy ypiga'ñ
miid yi' ajcxy. Ti Cristo yjäy
ñayñ'i'ixíyigixy, jaydēbi
ñaybáatigixip ytügmúccixip
miid yi', tim jadu'n nej tüg jäy
ñayxoxyii co ypiga'ñ.

⁸ Dios ti a'ixiy co Cristo yjäy
ajcxy ñayxoxiiyb miid yhuít
oyjatypi, huidibi adiicxp ajajp.

Je huit xojx oyjatypi jadu'n nipaady
nej je tudägy'ajtin huidibi je
mibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcuje
ajcxy pinjaty huoooyip ma
yajhuinxiiiduna'ñ Dios y'ung, je
Cordero, co naydügmugáanigixy
miid yi' yjäy ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihuiiyich
ma je ángel yhuinduu co
njahuindzigihuaañich. Chi je'
xyñimaayich:

—Ca' jadu'n m'idich. Dios iich
xytumbi'ajtp jadu'n nej miich etz
nej jacjadyii migügtijc huidibi
mijpidaaccixp cixyot huinijot je
ayuc tiy'ajt janchypi huidibi Jesús
ycapxhuäcx. Huindzigi' Dios.

Jadayaabi ayuc tiy'ajt janchypi
huidibi Jesús ñidiy'ajt'ajt, yi' je' je
Dios y'ayuc huidibi je profetas ajcxy
ñajtzcapxiy.

**Je mij'ane'mbi huidibi
poobcohuay yaj'ñaaayb**

¹¹ Chi nhuin'ijxyich tzajp'ahuädz,
chi yquëxgy tüg poobcohuay, e je

pin anajty yaj'iñaayb hue' anajty naydijyí je tudägypi je janchypí. Je huidibi tiydumb naaxhuiñyäjy miid tudägy'ajtin etz huidibi tziptumb miid tudägy'ajtin. ¹²E je' huidibi yaj'iñaayb je poobcohuay, je' yhuuin jadu'n je' nej jiinye'n, e ymiid anajty ma ycohuajc maycoroni huidibi nidíy'ajt'ajtp co yrey'aty ma tüg'óciy jäy. E je' ymiid anajty tüg xii cojaay, e je' anajty naydügpajc nejhuiyby yxii ca' jac pin. ¹³Hue' anajty yxoxiyty miid huit y'uuciyty miid ni'py, e je' yxii hue' anajty xii'adyii Dios y'ayuc. ¹⁴Je ángeles ajcxy huidibi soldad'ajtp tzajpjoty ypayöyí anajty ajcxy ac poobcohuaygixpi, yxoxiyty ajcxy miid sedi huit janch oybi, poobi etz huätzpi. ¹⁵Je huidibi yaj'iñaayb je poobcohuay, ma yi' y'ahuac ypidzimy anajty tüg espada janch jippi, e je' miid yajtzaachihua'n je maynaaxhuiñyäjy. E je' ane'ma'n miid Dios ymic'ajt. E miid yi' y'ayuc castigi möhua'n je mayjäy miid ypocy ycixpi huidibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada janch jippi. E yi' miid'adaanip je mijpi Dios chip y'ejcín, je Dios huidibi tüg'óciy mic'ajt miid. E mictägy tzaachypí castigi yega'n ma je mayñaaxhuiñyäjy miid ypocy ycixpi, jadu'n je maynaaxhuiñyäjy nipaady nej jihuüy Dios y'ung tenmicx uvas miid ytecy. ¹⁶E ymiid anajty cojaay ma yhuít etz ma ypuy jadayaabi ayuc: “Reydíjc ajcxy yrey. Huindzindíjc ajcxy yHuindzin.”

¹⁷Huin'it nhuin'ijxyich tüg ángel ytinäy xii'agujc, chi ooy janch mic miyaaxy tüg'óciy je joon huidijaty queec-huidijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸Miingix, jigix mdzüdzcixipy reydíjc ajcxy ñinícx, capitán ajcxy etz micjäydíjc ajcxy ñinícx, cohuay chüch etz nañ jadu'n je' ajcxy ñinícx huidibi yaj'iñaayb. Mdzüdzip tüg'óciy jäy ñinícx: tumbidíjc midumbidíjc, je huindzindíjc, comeeñydíjc etz je ayoobidíjc.

¹⁹Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ miid tüg'óciy ypubejtpidíjc ysoldadotíjc ajcxy. Nhuin'ijxyich co ti ñayyöymújcigixy co chiptunaangixy midziptzonaangixy je huidibi poobcohuay yaj'iñaayb quipxyi miid je' ypubejtpidíjc ysoldadtíjc ajcxy. ²⁰Chi je ca'oy'iyujc ymachycäy quipxyi miid je profeta ca'pi yjanchity, je tiibi anajty tuñ mijhuinma'n ma je ca'oy'iyujc yhuinduu. Miid je mijhuinma'n ycixpi je profeta, ca'piy yjanchity, ti anajty ooy huin'iiñ tüg'óciy je huidijaty ajcxy nayyejci co je ca'oy'iyujc ytiy'ajt ijpexpt cöbijci ma yhuimboc etz co huindzigiíyí je ñidzejtztuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jiin ytoy miid azufre, jadu'n je jiin nej tüg mejy huädz jiin. ²¹Jacadyii jäy hue' ajcxy o'cin patcixy miid espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huidijtp cijx je' ajcxy ytimycuuxtäayigixy ytimypejttäayigixy miid may öcpi chüch.

Je mil jímijtpi

20 Huin'it nhuin'ijxyich tüg ángel ycidägy choon tzajpjoty miidity je ahuasti huidibi miid yaj'ahuäch je mij jut huidibi oy yciicyity, ymiid anajty nañ jadu'n tüg mijcadena ma yci'.² Jadayaabi ángel majch je ama'y tza'n huidibi yajtijp mujcu' etz Satanás, chi yajcadenitigiiy, e yajhui'my mach tüg mil jímijt. ³Chi je ángel cötijnaxy je mujcu' ma je mij jut, chi cö'agiiy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'iiñ je mayñaaxhuiñyäj, ixti cooni tüg mil jímijt yca'pxipy. E co jadu'n anajty mil jímijt ti ñaxy, ooy ycopicyity co yajnajtzmazdihuipy je mujcu' tzojccíxy.

⁴Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcin co tiyúngixipy naaxhuiñyäj. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujctuutcixy miid co ajcxy capxhuäcxy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiigixy je ca'oy'iyujc, ni je' ñidzejtztuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi miid Cristo tüg mil jímijt. ⁵Je jacjadyi je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jímijt huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempo

mina öcpi ajcxy yjugypijccixy, e ca' y'oc'ó'ccixníp jadügtecy. ⁶Jotcuyc etz huädz, ca' tibocy miidity, je' ajcxy öcpidijc huidibi jugypigipy co Jesús yajjugypigipy yi tügpicy öcpi huidibi yajijp'adamb. Je mimetzpi o'cin ca' ni ti mic'ajt miidity ma je' ajcxy. Hue' janch ajcxy ytung'adiiyb huingapxi ma Dios etz Cristo. E je' ajcxy Cristo quipxy miid y'ane'mip tüg mil jímijt.

⁷Co anajty ti ñaxy je mil jímijt, huin'it je Satanás yajcoguetjtüdiy ma ymach'ity. ⁸Chi Satanás nicxy huin'iiñ je mayñaaxhuiñyäj huindu'mybi ñaaxhuiñ. Je' nicxy huin'iiñ Gog jäy etz Magog jäy. E y' ajcxy y'ane'mbidijc yajmujctähua'n soldado ajcxy, jigix chiptúngixipy miid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypä'ám. ⁹E jadu'n ajcxy ypediiy ma ymijhuinity naax, chi ajcxy yajnaadujcy je it ma chinaaygixy huidibi Dios ti huin'ijxigixy etz yajnaadujccixy je ciudad huidibi Dios chojcpy. Chi Dios quejxy jiin huidibi tzoomb tzajpjoty, huidibi oy ñöcigixy huädz huädz je may soldados ajcxy. ¹⁰Je mujcu', huidibi anajty ti huin'iiñ je mayjäy, oy yajcötijnaxy ma je mij jiin ytoy miid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypi paadipy xiim tzuum huinixii huinitempo.

Je tiyduunin ma je mij'ane'mbi yhuinduu

¹¹Nhuin'ijxyich tüg mij'ane'mdac janch poob, miid je huidibi anajty

inaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ljtcixipy. ¹²Chi nhuin'ljxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huidibi miid je jäy yxii cojay huidijaty ajcxy jugy'ajtin huinixii miid. Chi je' ajcxy yajtiyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³Je mejy yciyejctay je' je öcpi ajcxy huidibi anajty jiiby yajpatp. E je o'cin etz je öcpijut yciyejctay je' je öcpi huidibi jiiby yajpatp, e tüg'óciy je' yajtiydunday nidüg nidüg nej anajty ti chinaaygixy. ¹⁴Je o'cin etz je it ma je öcpi y'ity yajnajtztijyday jijnjoty ma je mijjiin ytoy. Je' je' je mimetzpi o'cin ma je mijjiin ytoy. ¹⁵E huidijaty anajty ajcxy ca' yxii ymiin ma je libro huidibi jugy'ajtin huinixiibi miid, hue' je' ajcxy yajnajtztijy jijnjoty ma je mijjiin ytoy.

21 Huin'it nhuin'ljxyich tüg tzajp jemybi etz tüg naax jemybi, com je jayijpi tzajp etz je jayijpi naax ti je' anajty ytigoydäy, e ni ma anajty mejy ycacädy. ²Hich, Juan, nhuin'ljxyich je ciudad huätzpi jemybi, je Jerusalén, ycidägy anajty choon tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyii ñayxoxyii co ypiga'n miid yëdyjc. ³Nmidoohuich tüg ayuc micpi choon anajty tzajpjoty, e yminañ:

—Cuenditun iich n'ayuc. Dios tzinaydac pigamb ma naaxhuiñyäj

ajcxy. Yi' tzinähuipy miid yi' ajcxy, e yi' ajcxy Dios yjäy'adiiyb. E Dios ci'm idaamb miid yi' ajcxy jigix yi' ajcxy Dios'adiiyb. ⁴Dios yajquëgiib ajcxy ytajin ymayin etz yajtädziib ajcxy yhuinni, e ca'p yjadiib o'cin ni jiyin ni yaaxin, ni jotmay, ni pin ycajiñhuihp je ju'pin je pa'min. Com je huidibi anajty ijtnaayb, ti je' ñaxy.

⁵Huin'it je' yminañ huidibi anajty inaayb ma je mij'ane'mdacin:

—Cuenditungix iich n'ayuc.

Huinjemy ngojtigadza'ñich tüg'óciy huidibi jii'ijtp.

Nañ jadu'n yminañ:

—Jaay jada ayuc. Com jadayaabi ayuc ooy jada yjanchity, e ooy yi' jot'amij'ajt miidity.

⁶Huin'it je mij'ane'mbi xyñimaayich:

—Ti tüg'óciy ytunyii yjadyii. Hich je' nyajtzondacp tüg'óciy tijaty, etz iich nyajcogixiib tüg'óciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiib je alfabeto. Pinjaty tzojcp jemybi jugy'ajtin iich yi' nmöhuip. Jadu'n nipaady nej jihuüy ajcxy ytidzfiygixy, e nyaj'ügich ma ymuxy je nii huidibi yejcp jugy'ajtin, ni ca' ajcxy mimeeñyduunip ni jadu'ni. ⁷Pinjaty mimadactaayb jibic-huinma'n etz pocytunii, yi' je' cidigihuiib huidibi një'ajtpy, e iich yi' xyDios'adiib, e yi' iich n'ung'adiiyb. ⁸Je huindzicytjc ajcxy, pinjaty ca' ymibicy iich ndiy'ajt, pinjaty tumb huidibi ca' y'oyjäygidaacnity, pinjaty jäy yaj'öcp, pinjaty migapxtigooyb töxyjäydijc, pinjaty tumb capxpogii, pinjaty mijpidacp

huijyäj yhuinma'n, pinjaty huindzigiyb quipychech tzaadzech, etz pinjaty aniidacp, je' ajcxy nidüg'óciy nibidzimiib ñicxipy ma mijjiin ytoy miid azufre, huidibi quëxícp nej jijnmejy. Je' je' je mimetzpi o'cin.

Yi jemybi Jerusalén

⁹Huin'it nidüg ángel je nihiuxtujcpi huidibi anajty miid huixtujc tasi ujtzjatypi miid je huixtujcpi ayo'n tzaachypi huidibi jac'axam tunaanip jadaanip, je' xyñimaayich:

—Min, e cham nyajni'ix'hua'n je mibijcpidijc huidibi tügmugamb miid Dios y'ung, je Cordero, jadu'n nej tüg yëydijc ytügmucy miid ytöxyijc co ajcxy ypicy.

¹⁰Je huidibi Dios yjihui'n ymic'ajt xyaj'ijxich cumäyjoy, chi je ángel cümäyjoy xyajnicxyich ma tüg cop mijpi etz cixpi, chi xyaj'ijxyich je mijpi ciudad santa. Je ciudad santa hue' je' yxii Jerusalén, e ycidägy anajty choon tzajpjoty jiiby ma Dios yajpaady. ¹¹Je mij ciudad santa janch adiicxp je' anajty miid Dios y'oy'ajtin. Jim jadu'n anajty y'adiicxy nej tüg tzaa janch oybi nej mármol, janch yaj'ijxnajxp nej ijxin. ¹²Jühuidityi anajty miiditye je ciudad santo ac poch janch mij etz cixy. Je poch ymiid anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpi ángel ma tügjaty ciudad aguu. Etz yjaybetyity je' ajcxy yxii je majmetzpi Israel tribu, tügpi tribu yxii yjaybetyity ma tüg tüg poch y'aguu. ¹³Tugiig anajty y'aguu miiditye xiibdzim'amy, tugiig

y'aguu ma tichypo ymiiniy, tugiig y'aguu ma jijnboj ymiiniyin, etz jatugiig y'aguu ma xiigidägy'amy.

¹⁴Je poch huidibi anajty ymiid je cajp, ymiid anajty majmetz tzaa huidibi y'ijx'ajtip, e majmetzpi tzaa ymiid anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ijx, tügpi apóstol yxii ma tüg tüg tzaa.

¹⁵Je ángel huidibi anajty miydacp miid iich, ymiid anajty tüg quipx ac tim oori je' anajty. Je' anajty miid quipxa'n je cajp, je poch y'aguu, etz je poch. ¹⁶Je cajp, je ciudad, hue' je' anajty cuadradi; nej anajty yoñ'ajt, nañ jadu'n anajty y'agon'ajt, etz nañ jadu'n ycix'ajt. Chi je ángel quipxy je ciudad santa miid je' yquipx. E hue' quipxy mejtz mil jamejtz migo'px kilómetros, y'ayoñ'ajtin ycix'ajtin etz y'agon'ajtin quipxyjaty je' anajty. ¹⁷Huin'it je ángel quipxy je poch, hue' quipxy migo'px jahuixchiguiipx midaax cínux, jadu'n nej naaxhuiñyäj ajcxy ycínux, huiidi je ángel yajtumy.

¹⁸Je poch hue' je' anajty ypochity miid tzaa oyjatypi, e je cajp hue' je' anajty ac tim oori, yguëxígy nej iix huätzpi. ¹⁹⁻²⁰Je tzaa huidibi je poch y'ijx'ajtip hue' je' anajty y'oyduñity huiidi miid y'oyguëxígy, tzaa janch oyjatypi canaagnax color. Je jayijpi poch y'ijx hue' anajty y'oyduñity miid jasje tzaa, je mimetzpi poch y'oyduñity miid safiro tzaa, je midugiigpi poch y'oyduñity miid ágate tzaa, je mimadaaxpi y'oyduñity miid esmeralda tzaa, je mimigooxpi poch y'oyduñity miid ónice tzaa, je midudujcpi poch y'oyduñity miid coralina tzaa, je

mihuixtucjpi poch y'oyduñity miid crisólito tzaa, je mituctucjpi poch y'oyduñity miid berilo tzaa, je midaxtucjpi poch y'oyduñity miid jacinto tzaa, je mimajmetzpi poch y'oyduñity miid amatista tzaa. ²¹Je majmetzpi poch'aguu hue' anajty y'oyduñity miid tügpí perla. E je mijtu' huidibi najxp cajpcujc hue' y'oyiyy miid oori huätzpi, e yquëxgy nej vidrio huätzpi yaj'ijxnajxp.

²²Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadájtigixy Dios etz je' y'ung. ²³Je jemybi Jerusalén ca'p je' anajty yajmayjaty xii po' huidibi yaj'anñhuip yajtiicxiñhuip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je tiicxin jajin huidibi amb tiicxp ma je Jerusalén jemybi. ²⁴Je mayñaaxhuiñyjäy huidibi ti patcixy y'alma nidoocin naxípy tigihuipy ajcxy miid je jemybi Jerusalén ytiicxin yjajin huidi anajty ti ymöyii. Je ane'mbidijc ajcxy ya naaxhuiñ ymimiinipy ajcxy mij'ajt, oy'ajt, etz cömay'ajt ma je jemybi Jerusalén. ²⁵E je cajp aguu ni camina je' agíy yca'idipy xiim, com jim ca' jim ycoodz'idipy, paady ni mina yca'agi' y'idipy. ²⁶Jim je naaxhuiñyjäy, canaag agajp, minicxip ajcxy ymij'ajt y'oy'ajt ycömay'ajt ma je Jerusaléngajp, je jemybi. ²⁷Ca'p jim ytigihuipy ni pin huidibi ca' ypocynñihuächñi,

ni pin huidibi tumb ca'pi y'oyjäygidaacnity, etz huidijaty jäy huin'iimb. Jëyi jim tigihuip pinjaty ijtp yxii cojay ma je libro huidibi Dios y'ung, je Cordero, ymiid, ma cojay y'ity je jäy ajcxy yxii huidibi ymiid jugy'ajtin huinixiibi.

22 Huin'it je ángel xyajni'ixiyyich tüg mijñii huätzpi, je nii huidibi yejcp jugy'ajt huidibi ca' ycixip ytigoyip. Janch huädz janch tiicx je' anajty je nii nej tüg ijxin. E je nii jim anajty ymuxy ma Dios etz je Cordero y'ane'mdac. ²Jada mij nii hue' je' anajty ñaxy cuidad mijtüguc, etz ma je mejtz'adu'm'amybi mijñiiba', jim anajty je quipy huidibi jugy'ajt miid, huidibi tiim'ajt majmetz'oc tügpí jimijt, po' po' ytiim'aty, e je quipy y'aay hue' anajty ytuñ jigix huaad naaxhuiñyjäy choocxixy. ³Ca'p jim y'adipy ni ti ayo'n ni ti jotmay miid pocytunii ycixpi. Je Dios etz je' y'ung je' jim y'ane'mdac ycötujctac yajpaadipy. E je' ytumbidijc je' ajcxy jim yajmij'adiib ojadadiib. ⁴Y'ijxipy ajcxy je Dios y'ung yhuiñyjiip etz yminicxip ajcxy je' yxii ycojay ma ajcxy yhuimboc. ⁵Ca'p jim ycootziñhuity. E pinjaty jim tzinaayb ca'p ajcxy yajmayjadipy linterna jiin, lamparajiin, ni xiidiicxpi, com Dios iich ajt nHuindzin yi' yi' ajcxy codiicxiib. Je Huindzin Dios etz je' y'ung je' ajcxy jim ane'mip huinixii huinitiempo.

Huingooniñ yi Jesucristo ymin'aa

⁶Huin'it je ángel xyñimaayich:
—Jadayaabi ayuc tiy'ajt ma jada necy, ooy jada yjanchity, e jëbi

miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'ángel jigix yajni'ixihuipy je' ytumbidijc tijaty tzojc tunaanip jadaanip.

⁷Jesucristo jadu'n yminañ:

—iMiimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt huidibi jaybetyip ma jada libro.

⁸Hich Juan, nmidoohuich etz nhuin'ijxich jadayaabi huidibi jaybety ma jada necy. E co oy jadu'n nhuin'ixyich, chi nhuijoj'ihuuiyich ma je ángel ytecymijc huidibi anajty yam xyajni'ixiibich. ⁹Chi je' xyñimaayich:

—Ca' jadu'n m'idich. Hich, Dios xytumbi'ajtp jadu'n nej miich etz jacjadyi migügtijc huidibi Dios y'ayuc najtzcapxiyip, e tüg'óciy pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰Chi je' xyñimaayich:

—Capxhuäcxi je Dios y'ayuc huidibi ti mjay ma jada necy, ca' myüdzip. Com ti yhuingoñ je tiempo mina Dios cuyduna'ñ yi y'ayuc huidibi yjayhui'm ma jada necy. ¹¹Pinjaty ca' ytudägyity, huen jadu'n jacyajpaady miid ycatudägy'ajt. Pinjaty jibicjot jibic-huinma'ñ tumb, huen nigi jibicjot jibic-huinma'ñ tuñ. E pinjaty tudägyi tumb, huen jactuñ tudägy'ajtin. Pinjaty huädz yjot huädz yhuinma'ñ miid, huen huädz yjot huädz yhuinma'ñ jacmi'ity ma Dios.

¹²Chi je Cristo yminañ:

—Timetiini nhuimbidityich jadüg'oc naaxhuiñ. Co

anajty ti nmiñich, huin'it nyajjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³Hich je' ti njayijp'atyich ya naaxhuiñ, etz iich je' cogixihuamb, tim jadu'n nej je letra A chondägy ma je alfabeto etz je letra Z ycogixiy ma je alfabeto. Hich ti nyajtzondacyich je naaxhuiñ etz nyajcixipyich.

¹⁴Jotcujc ajcxy pinjaty ti ypocyñihuäch, jadu'n nipaady nej ajcxy yhuít ti pujcixy e miid ajcxy yhuít huätzpi. Com ti ajcxy ypocyñihuaatzcixy, paady jëbi jñcxcixip je utz tza'm huidibi jugy'ajt yejcpy huidibi ca' ycixipy ytigoyipy ni mina, e jadu'n jëbi ytigiy ma je jemybi Jerusaléngajp.

¹⁵Dios ca' yi' ajcxy cöbiga'ñ ma je jemybi Jerusalén etz hui'mip ajcxy cajppa' tüg'óciy pinjaty huidibi jibic-huinma'ñ miid, pinjaty ca' mibicy Dios, pinjaty mijpidacp huijyäjy yhuinma'ñ brujo yhuinma'ñ, pinjaty ajcxy migapxtigooyb midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigiiyb quipychech tzaachech, etz tüg'óciy pinjaty tzachnixondacp anii ayuc.

¹⁶Hich Jesús huidibi capxp. Ti nguexyich n'ángel ma miich jigix jada tiy'ajt capxticxipy majaty mibijcpidijc ma tüg tüg cajp. Hich je' i'x'ajtp cop'ajtp ma je rey David miñ. Etz iich je' nmij'ap'ajtpyich nmijteedy'ajtpyich je rey David. Jadu'n iich nipaady nej je mijmadza' huidibi yajtijp jayxiim.

¹⁷Je Espíritu Santo etz je mibijcpidijc huidibi jadu'n nipatp nej Cristo ytöxyijc yminaangixy:

—Min ma Jesucristo.

E pin amído'o'ijtp iich n'ayuc ymínáangixipy:

—Min ma Jesucristo.

E pin tzojcp jugy'ajtin huidibi ca' ycixipy ytigoyipy nimina, jadu'n nej jihuüy ytidzïyïi e tzocy jada nii, huen miiñ, e nmöhuibiyich jugy'ajtin, jadu'n nej jihuüy nyajniï'ügich je nii huidibi jugy'ajtin miid e ni ca' mímeeñydunipy ni jadu'ñyi.

¹⁸Tüg'óciy pinjaty amído'o'ijtp Dios y'ayuc ytiy'ajt huidibi jaybetyip ma jada libro, iich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuib tzaachypï ayo'n, ca'ydi huidi

jaybetyip ma jada libro. ¹⁹E pin puuhuijtzp hueeni jada Dios y'ayuc huidibi jaybetyip ma jada Dios ylibro, Dios yi' jötziib yxii huidi cojaayip ma je jugy'ajt libro. Nañ jadu'n ypuhuidziïyb huidi anajty japaatip ma je jemybi Jerusaléngajp, huidi jada libro ñimiydacy.

²⁰Yi Jesucristo huidibi jada ayuc capxp, yi' minamb:

—Ca' ooy jecy njac-huäcxiba'ñich co nhuimbidiipyich naaxhuiñ jadüg'oc.

Jadu'n jada. Amén. iMin, Huindzin Jesús!

²¹Huen je nHuindzin Jesucristo may'ajt oy'ajt tunipy miid miich ajcxy huidibi mibijcp. Jadu'n ngapxycíxyich. Amén.